



尤菴集  
卷一

卷表

尤菴集

~16  
2410  
52



和  
2410  
60-52

九菴先生文集卷一百三十七

墓表

孝節嵐亭金先生墓表

嵐亭先生歿于嘉靖戊午至今百有餘年而鄉隣父老薦紳章甫誦慕之愈不衰謹按國朝三綱錄云金始昌金山郡人以小學律身遭親喪守廬哀慕足不出門外每忌辰哭奠如初喪久而不衰服康靖大王喪三年恭僖大王榮靖大王昇遐年踰七十而亦皆盡制徵辟皆不起老死林泉賜號孝節恭憲朝旌閭鄉老有謂纂錄諸公曰今所述嵐亭之行無乃大略而多漏耶應曰君讀小學不熟乎小學

書中有聖人之事焉有賢人之業焉今既日以小學  
律身則其所稱道何以加焉於是金山黃澗章甫相  
與言曰先生事實不但昭載於國乘當靜菴先生當  
路之日又與於七十人薦目今雖士論携貳人心不  
公而先生俎豆之奉烏可已也二邑同辭遂暇享于  
儒宮崇報之典可謂盡矣又按家乘及鄉老所記先  
生字廷揚系出豐德仍世居于金山高麗朝有諱崇  
善官海豐府院君是爲鼻祖祖司直諱孝信考不仕  
諱顛娶夏山曹承重女 成化壬辰生先生于郡之  
帶谷里生而氣質純美長而踐履篤實常以爲孝者  
百行之源故其事親也生則致其養沒而盡其哀祭

而極其嚴其居喪時有虎常來護其廬夜應哭聲而  
悲號焉逮其將沒之夕有氣上燭于天人甚異之先  
生娶司評禹孝親女生子儒 贈叅議是生純明  
贈左尹是生恕 贈判書是生大鼎知中樞是生應  
允應澤內外子孫甚蕃今應澤之子生員萬衡來請  
表陰之文余曰先生事蹟詳著於公私載籍復何贅  
焉萬衡曰雖然願爲之也余不敢終辭云時 崇禎  
闕逢困敦九月九日恩津宋時烈述

孝子栢陰卞公墓表

飛鴻里在清州治北三十里有篤行之人卞景福居  
之後有棹楔立焉過者式之不問可知爲卞公旌也

公九歲而孤能自居戚母夫人愍其羸弱誘使之肉  
公俯伏涕泣強之不已則遂投匿麻中終日不出母  
夫人大哭抱持而歸及事母夫人日常辨色而朝敬  
進所欲而烹飪不任婢使壬辰倭變公年五十五自  
負逃難如江革之爲見者感歎母夫人卒其執喪徑  
情寧戚日三上食虞祔後哭猶無時糜粥以終喪時  
閭里屢大疫公渾舍終得無恙以奉饋奠人以爲孝  
感喪除始歸其家猶晨謁于廟門之內每忌日前一  
旬不見客號絕如初終時或面有淚迹則家人必知  
其夢見父母也鄉人舉其焯焯者以聞於朝遂蒙旌  
命人人皆曰信年九十二將沒語家人曰虛生此世

孤負百年甚可愧也又作詩以見志有憂道安貧等  
語鄉人送葬者殆傾邑亦有屢日不肉者葬在清州  
住旺山配全義李氏先沒而祔焉昔歐陽子嘗表周  
堯卿墓曰禮之失久矣居喪者惟仕宦婚嫁不爲此  
特法令之所禁爾其哭泣之節居處之別飲食之變  
皆莫知其有禮故吾於周君有所取也使公得遇歐  
陽子其有兩周君乎公八溪人字仲申上祖光高麗  
侍中高祖孝文 本朝藝文提學曾祖鐔縣監祖承  
宗叅奉考忠男 贈判決事妣坡平尹宣佐女自提  
學以下世居稷山皆葬其地其家飛鴻自公始李氏  
奉養其姑三十年言色未嘗失教子女有道男惟寅

以行義聞二女適金大洋柳沃孫時望佐郎時益文科承旨時奭通德郎柳沃男正立佐郎二子掄文科持平揚業儒承旨一男搏叅奉通德郎三男擗擴扱內外曾玄不能盡錄公於飛鴻晚築小齋荷菊環之日對經書至老猶然豈浪然有會于心者耶見諸孫從宦戒之曰誠心奉公清謹律身無忝祖先其子孫之賢也宜哉銘曰

惟公之行 恩有旌典茲惟其藏後人毋踐

進士 贈左承旨李公墓表

故進士 贈承旨駒城李公啓仁字時望年三十一而以 萬曆庚辰七月十七日卒夫人李氏男大司

諫士慶縣令士吉承旨士祥後九十年孫監司後山始將表於墓前余按其狀其辭微其事隱似說不說噫知之矣蓋公考正郎諱蓋忠娶安氏女生公纔數日安氏沒未幾正郎公又沒公事繼母姜氏自以不得乎親怨慕痛迫以至滅性始公才高氣豪性直言峻儕流造門或不遇則輒憮然自省曰得無不可於意否乎嘗謂一人後當然其後果然年十九游場屋一時俱得三解仍並中司馬兩試搢紳日望其騫騰聞其亡莫不傷惜焉祖澱不仕曾祖宗衡進士上祖吉卷高麗壁上功臣三重大匡夫人 莊憲大王六世孫其考克綱屬疎爲僉正夫人性豁達公家既不

幸夫人以諸子歸依僉正公教誨有方卒能皆使立揚及見諸孫之顯榮以承旨從勳追贈公左承旨夫人受真誥 崇禎甲戌年八十四而終焉大司諫男後天叅議後地進士後淵未仕監司其第三而承旨鄭攸婿也縣令男後發後俊叅奉塔縣監權勣也承旨男後傑衛率後老正郎後昌進士婿奉事崔致榮韓聖舉尹塹也牧使峻岳郡守挺岳牧使河岳叅奉舜岳侍直宣岳其曾孫而餘及玄孫多不能盡錄公異母弟榮仁其至行恰同王玄通使公家終不顛覆皆其力也至今兩家子孫甚相親愛豈亦公之遺風也歟噫遭變事而不失於中固天下之至難也而小

弁之怨親親也公於是乎亦足以知其仁矣今茲記亦甚略盖不敢詳言以傷公之孝心也時 崇禎屠維作噩十二月日恩津宋時烈述

安定朴公墓表

仁祖大王改玉之初黃澗縣人合辭進薦劄曰伏見士人朴事三天性至孝纔免襁褓則知敬愛於親親在不敢喧囂親瘠輒涕泣不食人不名之而名以孝兒六歲其母死攀號守殯晝夜不去父廢疾三十年奉養之誠如一日盖其羣行焯焯者不可選紀故不惟鄉里之感歎亦有可徵於物者盖嘗久違定省其心不自克口自語曰吾念吾親如此親亦念我也哉

有畜犬若聞之起而若聽之拱而若請行者然修書以繫其頸則往返以時日以爲常故莽蒼之地聲息相續時又自外至向人人立而啼人解其意尾而往則若雉若兔則已逐殺之矣又有胡鷹棲集園林不事條籠而聽順如人故其親甘毳常自有餘夫二物非有性於仁義者其特感於所畜者乎既又從事儒賢耳濡目染日益脩進操履端潔氣識淵偉又非一善成名之比信乎氣質之用少而學問之力多也當此旁招之日此人實合稱塞不敢以寡言溢辭上誣明時也然世方以藻華粉澤爲賢而又無有力者推挽故公卒以無成 崇禎甲申年八十一而終惜也

豈公所能者天而不能者人乎公沒後十三年 孝宗大王丙申始贈叅奉蓋孝子賞職也公字如一忠原人鼻祖英羅祖赫居之裔其後有以州牧特 恩禮葬者曰孝誠有爲縣監者曰源直曰址曰成捷而有以大耄受通政者曰以麟世以清白孝友相傳通政娶江陵崔滉女生公滉叅奉也公少從伯父正郎以龍學正郎喜文詞以聲病獎後生公則不屑也及就重峰趙先生諱憲之門爲其妹壻則先生告以古人爲己之學公敬信之嘗曰大賢吾不得而見之矣若重峰其殆庶幾乎自是不復有科舉之念嘗自扁其室曰安定蓋取大學知得之義而玩心焉所居黃

岳之東前帶清溪林樾茂密靜坐茅簷冲澹自遣時  
與族人談桑麻講租稅其閑野之趣雖與人同而其  
習聞儒先長者之緒餘泯然有以會於心而適於身  
不知爵祿之可慕勢利之可懷悠然不知老之將至  
則人或不能知也趙孺人籍白川莊嚴有禮趙先生  
嘗曰吾妹女士也壽七十五與公同塋二男惟棟以  
文惟深以幹有稱於人惟棟以進士除 穆陵叅奉  
女三人適李遠基李廷或黃德固惟棟有三男含章  
獻章天章也三女李文龜柳時澤郭檢也各有子女  
而皆幼惟深無子以獻章爲繼李枝根樟枅格措全  
匡輔崔興國遠基之子若壻也李錫禧錫祉錫祐錫

祺錫禎金堡慎景全廷或之子若壻也李繼孟德固  
壻也內外孫曾皆良子弟世蓋貴耳而賤目皆以王  
祥董邵南爲不可幾及蓋觀於安定公而知斯之誣  
也嘗聞朴孝子應勳裸而守墓有虎來抱而溫之是  
公之叔父云

贈典籤鄭公墓表

孝宗大王元年金山郡人士長老合辭言于郡守曰  
故郡士鄭善行性至孝宗族不稱其名而稱以孝兒  
十六其母死哀慕之聲人不忍聞壬辰負父逃難間  
則鬻鹽以爲養而親極滋味其父曰是兒也宜錫嘉  
名以稱其實也故舊名後興而以今名行旣而其父



死則伏在凍洛之地枕塊以過三冬適癘氣熾發人以俗忌勸止祭奠則輒掩耳不以聽嘗以奠具之闕感然而傷則有雉飛入于厨又有虎以一犂白晝來致其事妾母撫庶弟極其誠心沒齒同居與其妹析著自引其田荒而僕老者其孝友之行雖古人何加焉光海時有族女入椒房有寵以故除繕工監監役心甚愧惡自京卽日遁還若將浼焉人亦不敢以其官呼之其所守之確又非今世所有大者如此其細可略也郡守曰彰善旌淑吾職也卽以申于監司監司上其事 孝宗大王特加嘉賞命贈宗親府典籤噫 聖上崇化善俗之意可謂至矣公延日人遠祖

襲明麗朝名臣世仍顯赫高祖從韶成均司成曾祖以僑弘文校理兩世皆文科重試祖公清監察考麟厚察訪妣元氏司勇吉輔之女公字子顧享年七十六配慎氏以溫淑誠慤稱其父復起官叅奉後公十九年以甲辰歲沒而祔焉男維訖維護維誠維諍維章二女壻金濡張百壽也內外孫曾男女摠三十餘人余惟良不興行久矣今按鄉人所舉則江革王祥薛包之事具於一身而至其潔身昏亂之朝素履以終其身則卓卓乎不可及矣可敬也夫諸子皆好善有文而長者尤克肖云爾銘曰  
余讀董生行未嘗不掩卷而齋咨嗟公之至行不獨

天翁之知鄉黨稱之 聖主褒之嗟公之所遭豈唐  
貞元年時吁嗟乎可謂能於天與人而

義禁府都事閔公墓表

閔氏有諱桓字子淵官金吾郎者孝子也生而致其  
養歿而極其哀卒死於毀毀瘠傷生雖不可謂之孝  
而自世教衰人昧本性有朝死而夕忘者子路笑魯  
人之朝祥而暮歌者則聖人非其責人之無已非魯  
而他可知也若公者不可謂非孝也公驪興人 本  
朝審言 魯山主讓德時以判書不仕而終于家世  
稱判書公之裔不待譜而知也左贊成齊仁子郡守  
贈叅贊思容生公之父汝儉官蔚山府使贈判書其

配李氏府尹贈判書廷鸞之女公十一歲始學藝業  
日進十七中司馬在榜中獨秀出與澤堂李公植白  
洲李公明漢並以妙年才藝稱聞喜宴月沙李公廷  
龜休翁鄭公弘翼來見公歎曰生子當如是鄭公不  
忍捨遂携以歸授小學書公亦敬信惟其言是從年  
二十一 國家別設庭試于全州公占第三名以微  
省考官拔去之旋除義禁府都事適因海州牧崔沂  
獄失姦兒意坐落職及廢 母議起詢及冗散公歎  
曰彝倫喪矣遂獻議曰處變之道當如大舜云常懼  
懼耻居其邦癸亥母夫人歿水漿不入於口終喪嘔  
粥哀毀一如初終府使公疾革於旅館斫指進血及

喪哭踊踰禮適值師旅權行殯葬急尋寡嫂于寇亂中携歸鄉里難已以禮營壙廬于墓側雖蔬菜之屬味稍佳則不食曰吾親在土何用食爲雖食亦不下咽只進數溢糜粥如袒括之日見者愍其骨立伯氏諱枰友愛篤至開諭以薑桂諄複百端公曰愛親之心人孰無之伯氏強之不已公終不聽遂以翌年戊辰臘月廿九日未終喪而卒得年僅三十五葬於懷德之先兆後與淑人安氏同窆于公州虎洞負壬之原安氏順興望族其考擇善也克配公美壺儀無缺後公三十五年六十七而歿公既篤於其親而又推之同氣伯氏不良於步履公常自養壯馬又以恩義

懷健僕曰爲伯氏爲異日避亂計也據此一事他可委也有男女各一男光炁女適宗廟令沈光泗孫男德重行重徽重得重女壻李惠疇俞命遵沈令五男相撥櫛枋檜二女適洪萬紀申洞德重男鎮綱鎮絃二女爲俞命集宋姬弼妻行重徽重得重皆有男幼余少時公以經杖訪我先君蓋爲府使公求美木也先君對語移日其涕泣言辭之戚感動傍人及後見忘哀者則每恨其不使見公也今五十六年而因其胤子之懇銘其墓而益歎世道之愈下也銘曰聖人有言過猶不及然以喪過乎哀著之於易嗚呼易之興其衰世之意乎後之論公者盍以是視諸

洪生粹元墓表

嗚呼此處士洪粹元建初及其配李氏墓也建初性孝其考花浦公諱翼漢嘗病癰甚殆建初吮且嘗糞年廿七崇禎丁丑正月虜陷江都廿五日繼母許氏遇賊不屈遂白刃交加建初以身翼蔽而死之李氏亦自剄于其傍嗚呼花浦公大節既與白日爭光而今其家孝烈又如此花浦公可謂有妻有子而李氏宜爲建初妻矣夫禽獸亦有感於所畜者矧以天叙之懿而化於門庭者耶然而旌典不及焉惜哉建初母具氏李氏父獲噫俱不死矣况建初之系乎故不著後三十七年甲寅九月日恩津宋時烈述

靜觀李公墓表

盖當我仁孝顯三聖之朝靜觀李公始爲諸生以詞章伏一世及通籍以標望領摺紳及其未老以恬退樹風教以扶世道然恬退亦有許多般有筋力既衰倦而歸休以養廉耻者有厭棄紛囂自適於山水者有脫略功名高厲於阡陌之上者皆足以振揭高標激揚頹俗而至於爲己求仁之方則或有歎焉者矣今靜觀退在郊居日對聖賢書沉潛酣飫以味其真腴必有浪然會於其心人有不及知者矣盖曰吾於此事恨覺悟之已晚而慨年歲之不足遂委己而擔當忘世人之指目非有過人之勇者能如是乎朱

先生嘗曰便年二三十歲覺悟便從二三十歲立定脚跟做去然吾聞其語矣未見其人矣若靜觀者殆庶矣乎靜觀誤以余嘗從師友之後猥與酬酢辨論蓋將相期於千載之下矣今乃先我而逝矣痛切磨之無人顧世道而悼心今其胤子喜朝克承其志事要余文題其表陰余既已銘其碑矣復略書數語以寓其悼惜之意云公家素清貧墓事益旁落叅判閱公著重公瑞爲備此石監司柳公尚運悠久出力以刻二公皆同余敬慕者也

承文院正字金君墓表

沙溪老先生金文元公有孫曰益煦字仲明其考吏

曹叅判

贈領議政諱槃妣

贈貞敬夫人徐氏丁

丑虜變立懂旌閭君年二十一中 崇禎乙酉進士二十五捷己丑文第時賢俊濟濟君獨秀出儕流莫敢望焉將以爲藝文館翰林玉堂南床位其十二月二十三日卒君聰明溫雅仁恕出於天性人以爲真老先生家子孫也是歲 孝宗大王新卽位以禮聘文敬公金先生君以從子與其兄滄洲公益熙仲文陪侍出入周旋諷議朝列皆聳觀焉文敬先生修正國喪典禮經變繁縟君素明敏又多家庭聞見與滄洲執筆贊助旣進 孝宗大王極加睿獎以爲百世以俟而不惑矣及卒文敬先生慟惜忒甚滄洲公哭

之幾於氣絕嗚呼若使天假之年則其所就何可量也配沈氏青城君廷和之女翰林忻之孫判書忠謙之曾孫貞淑絕異君歿自矢以下從滄洲公勉以糜粥亦不聽竟以翌年庚寅十一月命盡聞者莫不悲傷始祔葬楊根地沈氏之傍麓後改葬于水原治東魚吞里負丁之原有一子萬吉今爲江春道觀察使例贈君吏曹叅判君孝性天得徐夫人喪年僅十三執制如成人仍哀毀致疾滄洲公勸以肉汁君終不肯開口滄洲公相持號泣傍人不忍見也己丑余猥同文敬先生被 召先生謂君曰汝早年登科宜習家庭之學因指余曰此曾學於溪上宜從而質問君

曰唯首尾半載無日不相從余嘗問君誰與爲友君曰唯李端相幼能而已今君與幼能皆不可見吾道益孤而老先生又被時議侵誣世道之不幸甚矣觀察謂我曰吾不能知父母顏面嗚呼孰爲我記其言行余曰捨余其誰遂隕涕而略叙其槩如此

光城府院君金公墓表

嗚呼瑞石金公亡矣世道國步誰爲扶持一治一亂相承而不已方其將亂而天必生能弭之人抑公非其人耶嗚呼頎而碩豐而秀眉宇疎朗風度凝遠望之儼然可敬而卽之溫然可愛者非公之容儀也耶嚴重而寬厚肅括而宏深嶷乎若山岳之不可動淵

乎若河海之不可測者非公之局量也耶循蹈繩墨不失尺寸處子之自守不足喻其敬謹被服禮法無所芬華寒士之自奉不足喻其簡約者非公之操履也耶樞機靜恣而不失於臯緩謀慮深長而發之以勇決者非公之才猷也耶若其居家行義一遵乎我老先生遺法孝友孚於家庭清節信於朋友夙夜匪懈以事一人則敷奏真實儘乎不終爲空言仁威徧布以臨三軍則感悅服懾幾乎有勇而知方末乃沉機宥密不動聲色而用底大勲其以富麗文章黼黻王猷則卽其餘事耳然而謙退不居素履彌亮雖古之賢人君子何以加焉此其當一亂而能弭者非

耶方將歛就初服收拾老先生文字以詔穉昧以惠後學於無窮矣功未訖而居然就世豈天之生公者只擬於一亂而已耶况其一天共戴之痛隕首崩心常不欲生觀於南漢將臺之記可見矣 孝宗大王嘗曰與我共事者其誰乎其所指準者惟公等若而人耳上天不仁中道 薨殂公之深恨者不但在於攀髯莫及而已今茲一片廣陵之土埋却千古未死之心此心卽臺記所謂良心也嗚呼可勝悲哉余以無狀詆訶溢世仍以親厚勲戚得罪於時議嗚呼是不讀晦翁記譜者也昔趙子直宗戚也崇勲也其所作爲者不能無逆順名實之疑然而晦翁以難進易

退之心樂與之同寅協恭期成大猷况公事業俊偉  
光明名正言順百世以俟而不惑而顧乃却收神功  
九三勞謙其德亦盛矣然則余之親厚於公可幸無  
罪也耶嗚呼是豈易與不知者道也噫 崇禎強圉  
單闕仲秋日德殷宋時烈述

吏曹正郎俞君墓表

市南公沒愈久而士友愈不能忘嗚呼何故而其胤  
胤甫兄弟又相繼奄忽耶嗚呼此胤甫之墓也余可  
無一言之識乎君少有夔駕氣市南公防束甚嚴君  
移其所負氣折節以承庭訓故文與其爲人驟進年  
廿六詣場屋當應格中第而以小嫌自避去以遲三

年後得之而不悔也其樹立有如此者君姿貌卓犖  
操守堅確孝友之性出於天得市南公病割指進血  
號泣露禱憂吉纔一期復遭母夫人喪君已病矣而  
尚守墓不去人勉以少變居處則輒拒之曰死生命  
也及其不可爲不聽其妻入訣曰喪次非婦人所當  
近命加衰經于身泣曰今茲殷奠之日吾不得行事  
矣嗚呼君可謂篤孝君子也君喜讀周易及程朱子  
全書嘗於 胃筵手作先天圖以進其枝幹節氣如  
指掌矣於書無不觀而必究其義趣之歸其造詣亦  
不淺矣朝廷嘗欲以泉漳人漂到者九十餘執解于  
燕山其人尚不改 皇明衣冠而自謂如田橫義士



君時在縣職歎息曰此大義所係其可以外官自嫌而不言耶遂上疏極言之不報嗚呼此見君之見義而能勇不顧禍福也君以 崇禎己巳生廿九擢大科說書注書翰林正言持平修撰吏曹正郎世所謂極選而皆所履歷也他遷又六七官爲養爲洪川宰其政事過人者遠而於君不足稱也臨屬續顧語其子曰奉先盡誠勿近非義富貴非所願也嗚呼非有素養何以與此雖古人何加焉君名胤杞溪人始祖義臣嘗顯於麗朝至 本朝其世尤盛市南公諱榮妣國姓 世宗大王九世孫山岳之女君娶尹氏郡守衡聖其父也有至性君疾革斫三指進血事聞

旌閭男相基亦世其家女壻宋茂錫余孫也嗚呼君今其已矣使君而無死則將退修於家進爲於時大爲一世之光而承市南之志事矣不幸壽命不長而又不勝喪天何以勸世之爲人子者耶君以余從先友之後相與父子視故市南雖沒而與君相期於千載之下者深矣記昔甲辰余過江吊市南公薄暮望其廬於遠郊聞君哭聲甚悲旣近其廬愈不忍聞旣吊而退君又就余館號泣達晨余歸道山回其望余哭愈不已余意仁者可知其愛而非強有力者不能也其後訪余於山中相與校訂其父書日夜甚勤而體未少疲余謂其精神筋力實有大過人者其得遐

齡也必矣今乃先我而去盖不但爲君慟而深爲世道歎又復自悼其不幸也

申舅倩墓表

申舅倩之歿余爲文而酹之曰余於君實有所不能識者謗溢一世而天倫骨肉無不悅服人皆掉頭而先輩長德好與彌篤連日不舉火而僮僕不忍去其阨困極矣而氣類言辭常有如自樂者侷儻弛置而義理之說未嘗不悅遺落世事而語及當世怨痛號泣若余之孤枯愚滯舉世爭仇而惟君見愛深至雖規責迫切人有所不堪而交情終始如一日此余之不能識君而亦不能自識也豈君危其行而不能遜

其言守其大而小德出入也耶抑欲自廢其身是非毀譽皆有所不顧而其中有所自得如古人之說也耶今其胤日華請余銘其墓嗚呼余豈復有他語哉盖君事親也或詭於正而爲愛也至與諸弟多涉於嬉而爲友也深御家衆也慈過於禮而不敢橫與朋友諧謔無嚴而要於信盖其所存所行實有使人難及者而亦有使人難知者故人之見之者或有駭然者而細考之則莫不有倫脊焉余嘗以是自謂粗識君矣然則前所謂不識者是真不識而今所謂識者是真能識君者歟必有能辨之者矣惟其江都之變其母夫人定計於鮮則君常痛憤怨疾如不欲生嘗

自謂如不得奮臂揮戈決死於讐虜則無寧自廢其身不復立於天地之間 孝廟時以十策授余皆固邦本修軍政之意也其足跡未嘗至於京邑嘗以事一至焉則有知舊勉以留仕君趣裝卽出若將晚焉此則無貴賤愚智皆識之者也然則其見議於人者皆所以自廢而其所以自廢者豈非所以扶植春秋之義者耶君名舅平山人高麗大師崇謙之後 本朝叅贊諱瑛 中廟朝己卯名賢祖叅判諱鑑 仁廟朝名臣文貞公諱欽之弟考侍直諱翊隆自亂後潔身不仕以沒其世娶左尹韓會一女生君君前配洪氏其考履一官僉正與其姑韓氏立僅於江都俱

表其門季姬趙氏滄江公諱凍之女生長法家婦德克備侍直公嘗曰吾見婦女多矣未有如吾婦者也後君十年沒而祔葬于禮山之先塋有四女而無子日華卽君從兄冕之出也女長適金五章次郡守尹謚士人朴成翼察訪宋殷錫也日華生三男皆幼嗚呼舅情乎今日何處得來世道益下人心不淑春秋大義無處可說悼君之亡愈久而愈深於是乎始知所謂識君者真不虛矣遂書此以識余悲云

進士鄭君墓表

善叔河東人聰敏穎秀讀書過目輒成誦有大宰以文自負者嘗親至門見君所作稱賞不已弱冠魁發

解選入上舍人皆謂朝夕當闡大科不幸游遭所生  
所後喪 崇禎丙辰闕所後喪君自少慕城市大隱  
常超然自守至是益無當世意復以時事變嬗益不  
樂於心謀卜築於報恩之深峽養拙以自終竟以戊  
午十月廿一日卒于報恩之寓舍年五十九君事親  
顏色或不豫則輒下堂請罪不得命則不敢入私室  
起敬起孝得其色降然後乃已嘗與私親兄弟祈著  
君曰析著探籌是市道也擇其善美者以厚主祀人  
次及其昆弟姊妹之貧者嘗不事產業曰人不有貧  
窮則安知清涼趣味乎况吾性拙雖欲強心以智而  
不可能也峽中有田歲可得累百斛穀而佃人以歲

惡不能入請他物以代之君驚曰是奪飢人口中食  
也卽取其券焚之其於宗族益篤恩義恤其飢寒甚  
於已私故來者如歸或有負笈來從經歲不歸者以  
故妻孥常不免飢寒而君處之晏如也嘗植松竹梅  
菊日哦其間曰吾性不喜紛華此四者取其歲寒之  
節又嘗以六吾扁其堂曰食吾田飲吾泉守吾天終  
吾年人亦無求於吾吾亦無求於人君雖自韜晦而  
自有日章之實要人達官扣門相訪要與之交君不  
爲往謝曰脚踏朱門心實內愧日閉門靜坐惟以書  
籍自娛自世道一變隱憂浩歎常若身罹禍網者其  
發於吟咏者無非嫉邪與正之意親屬有染於時論

者則絕之甚嚴使諸子不赴場屋曰此時爾輩雖或  
倖占余豈樂乎此也時輩之據大權位者數輩亟欲  
汲引使其所親來試意君只相對冷話而已則又遣  
一宗室與君爲族者問以已亥喪服君逐節論辨其  
人含愠而去人爲之代怖而君則夷然也君書畫絕  
妙得之者皆藏以寶君博極羣書嘗按據天下山川  
形勢道里遠近叅以諸家圖誌深有領會有若身親  
經歷者然後撰成皇輿圖二卷東輿圖二卷獎進後  
生多所成就見人小善必歎賞稱美猶恐其湮沒貞  
民奴也而亦書于冊旣年近周甲喟然歎息以爲少  
時出入先生長者之門得聞格言至論日夜服膺只

緣立志不固不能力行以至于今徒有日暮途遠之  
歎嗚呼君可謂勉焉孜孜不知年數之不足者歟最  
後喜讀周易旣窺見理象之原則又揭周子太極圖  
於壁心玩索焉不有泯然有會於心者安能如是  
哉君名慶欽遠祖芝衍麗朝判選部事本朝麟趾  
官議政自是門戶益大祖應斗以正言擯斥於昏朝  
淹沒海中所生考以直其配學生李榮禮女所後考  
以重官府使君娶德水大姓李氏父稠官郡守男維  
復維漸維升四女適金盛完權情許顛洪聖運君所  
後妣朴氏察訪廷璉女余中表親也故君呼余爲叔  
亦嘗讓抗而慚丁比數十年來落落相望而慕義之

深則直與之相期於千載之下矣今遽先我而死矣其諸子謁余文將以誌其墓余於君知之深望之厚哀其死而屢出涕焉其可忍無言乎銘曰  
彼躁而我靜彼競而我退惟其自足乎其中所以不求乎其外始終無玷如石其介矢者少而存者長兮維百世其不涼

### 尹甥墓表

尹君子上就館迎我女之日其父石湖公汝望其叔會西公言甫謂余曰此子可教也願終教之其外祖李公瑒則曰公得師矣此兒雖少可師者多矣其後察其所行所言知李文之言非出於戲也厥後數十

年之間與之處益久而察之益熟則益知李文之爲信而汝望之爲謙也歲壬子遭內外喪聞其執喪之節常爲之出涕翌年爲請其先銘訪余於山中余就其次而弔之見其哭泣之哀顏色之戚不忍與之對也居六七日余朝夕就之而未見其不如此也甲寅冬以余朝夕就戮又來見而其哀戚未嘗少衰也噫人孰無天顯良知而未嘗見如子上者也或出於企勉而及於禮者有之矣其發於誠心自然而不已者難也故聖門高弟哀或忘於三年之內又禮稱二連之孝曰三日不怠三月不懈期悲哀三年憂又曰練而慨然祥而廓然夫順變者禮也不變者心也禮者

順時而成心者循性而愛若子上真可謂發於誠心  
循性而愛故自能始卒如一日者歟然余已以爲深  
憂矣子上果以 崇禎乙卯四月十日纔外除而終  
焉嗚呼天何以勸賢孝之人哉爲善者無或不怠乎  
魯西公嘗曰此兒有守卒能有成矣余始也謂其能  
業其家學克克其美質卒究於大有成就矣今其所  
就者只爲孝子而已乎嗚呼其不然也子上其氣溫  
然其心粹然其質清而物欲不行其行潔而俗習自  
除讀書常求體驗處事常要當理見賢好之以誠聞  
義從之必勇衽席之間不捨謹獨之功朋友之交未  
有昵狎之容其爲人不已成乎特其誠孝有大過人

者凡其衆美爲其所掩然終亦不可掩矣以余所見  
其程門邵公之流而或過之歟嗚呼惜矣余性質麤  
厲每見子上必歛衽敬服謂終始相長以資觀善之  
益矣今其已矣何處得來嗚呼痛哉子上在時連喪  
二女今有二男二女嗚呼其佑成之哉吾聞仁者必  
有後子上其所謂仁者非耶石湖公諱文舉坡州人  
仁祖朝名臣八松公之第四舉君名搏生於 崇禎  
戊辰月日云

李生煥墓表

仲厚之亡倏忽八年于茲矣其子覃慶等來求表壙  
之文於余嗚呼微余孰知仲厚之賢哉仲厚是非哲

於中而處之若愚利害交於前而視之如瞽不與人  
往還無以世歆羨事親以誠而不顯著慈子異常而  
勤策勵一言蔽之則悃悃無華嘗從余講書既受室  
抱子而來有請余誦古訓曰教婦初來教子嬰孩仲  
厚於座三復而深味焉其後諸子以孝聞而旌閭者  
三人其心服古訓之效乎仲厚之世始於羅祖功臣  
謁平至麗氏有益齋先生齊賢益齋有傳神一簇相  
傳四百年而藏貯篋笥仲厚別立一間屋奉安焉過  
者入而瞻拜之同宗或摸勒以去其傳遂廣夫四百  
年間益齋所不知者幾何人而仲厚先舉其所未遑  
斯可謂事出名上者歟考復益祖胤曾祖貞宗外祖

漢陽趙龜祥娶司果李光立女國姓也生男覃慶昌  
慶元慶鳴慶有慶昌慶元慶鳴慶卽旌閭者也四女  
適朴履寅金猗金以成郭槃一女幼仲厚有一姊事  
之如母哭其亡致哀因以病終不起得年五十八葬  
在報恩之九屏山下負酉之原嗚呼其頽然處順之  
容今不可復見矣 崇禎旃蒙赤奮若仲春日恩津  
宋時烈述

真寶縣監尹君墓表

今 上元年乙卯廷臣以賤臣時烈爲卑主貳宗無  
君不道 上貸其死投之北裔余自南方向謫所正  
月十九日路過東郊時汝良病臥京中強起從士友



百許人要之于平丘驛館勸余以酒曰朝甚寒矣余  
迫於嚴程卒爵而卽起汝良將追余而遠將矣行莽  
蒼地聞汝良死矣噫汝良強其死病出四十里地而  
又淨安泣別亦足以傷其生則是汝良由我而死矣  
雖曰大限止於斯靡余則亦胡爲中路耶噫今日無  
老少同一運氣汝良安得不死耶余嘗讀韓文公謫  
揭陽時哭女孥之詩而隕淚也嗚呼今茲情抱何以  
異此然韓公則親視棺歛而盡其哀余乃不能焉則  
益無以爲心矣今者其嚴公承旨飛卿冲舉以書來  
曰子誠視我子如子矣雖在罪罟中尚可爲一言以  
表其墓乎嗚呼余尚忍銘汝良乎汝良名明遇坡平

人高麗莘達洎瓘皆爲大官其後坤事我 太宗大  
王以功封坡平君高祖仁涵叅判曾祖弘立典籍祖  
惟健進士有文行冲舉娶佐郎李九淵女汝良其長  
子也自幼醇謹寡言笑十五就趙樂靜錫胤學廿一  
中司馬兩試樂靜惜其局於藝勸以進於此者汝良  
亦勉學不怠後以薦釋褐爲齋郎陞至直長遭祖母  
喪火發殯堂母李氏意冲舉救柩在火焰中自投而  
燒焉汝良如不欲生其哭踊號擗人不忍見焉服闋  
朝廷嘉其孝除重林道察訪以事遞旋拜內侍教官  
陞主簿爲真寶縣監汝良自入仕以來存心愛物所  
濟甚多故其管下役隸輩必立碑以頌之古所未有

也及是適值大饑血誠賑恤其法實遵朱子條例道  
臣上聞 上特加通政資瓜遞常在西樞有所任事  
不憚險夷及余得罪率諸生犯雷霆叫 闕訟寃嗚  
呼苟利於余忘其身而爲之豈所謂仁勇人者非耶  
汝良今其死矣何處得來耶汝良孝於親友於兄弟  
信於朋友其行備矣而其年不永止於四十六天之  
報施善人其何如哉妻河東鄭氏生子鳳儀女適士  
人金衡壽其二幼再娶崔氏女未有育墓在抱川旺  
方山西坐之原嗚呼古人有言上古之世仁義行焉  
故父不哭子而老不哭幼今冲舉白首殘年衰服呼  
天余謂冲舉公雖哭泣而無益於已死者願勿永傷

以慰死者之孝心未知冲舉其信斯言而汝良亦不  
飲泣於九地也耶嗚呼是亦可悲也爾系之以辭曰  
有紛霜雪蘭萎折萎折何傷猶抱香

進士朴君墓表

嗚呼此光州之晉谷里者安村朴士述之葬也士述  
生質魁偉卓然早成年十四加冠娶婦幹家以事母  
雖老成人有所疑難必咨問焉則片言以决之十五  
游膠庠取友不苟爲文宏肆霽霽場屋戰藝屢屈人  
廿四游京師見尹鑄而歸語人曰非吉人也聞者愕  
然三十成進士入大學一時賢俊皆與之交有閔黈  
者新取第來謁聖士述不許曰是嘗醜詆先賢以此

大忤於其黨中歲不屑於科業雖以親意黽勉而其志則專在於爲己一邊也逮至甲寅乙卯時事大變則遂絕世路意或有開之者則曰此非出身行道之日也然居常憤歎欲與同志上章叫闕極言邪正之辨光海朝兇徒餘孽乘時媒禍而方伯權大載州官朴興文嘗以閔黥素欲甘心故遂與同志酷被桁楊而士述不挫也嗚呼士述今其死矣今世復有斯人也哉士述孝於親慈於衆信於朋友晚來委已於學其進將不可量也嗚呼運氣不佳士述安得而不死哉余甚孤陋與士述初無雅一日千里來訪接其容貌聽其說話令人灑然心醒余在海上士述又與

士友若干人來見其歷變履險如此其至而氣岸言論猶夫昔也余以爲此將爲銀山鍊壁也今遽至此鬼神其不仁也哉文谷相公以書訃而弔之甚慟亦可見風聲之入人深也士述平陽人十代祖錫命本朝勲臣蓋與仁叟先生同宗也祖昌禹進士考天用有文而早世母南氏性嚴有法度士述娶洪氏生一男六女男重繪明秀志學士友稱之四女皆爲士人妻其二未行銘曰

於士述其貌嶷嶷其言侃侃其行有常其志不亂而氣與質其用蓋小大者是期力追古道半途而闕天道茫茫吁嗟士述永闕其光不亡者存維久煌煌

九菴先生文集卷一百三十七

九菴先生文集卷一百三十八

墓表

高麗典書朴公墓表

我世宗朝名臣朴彭年號醉琴或曰非也醉琴懼丹書家以覆然人必稱曰醉琴醉琴有墓在公州儒城縣大別里遯願洞則人又尚而識之曰此醉琴之曾祖余一不知何以得此也朴氏出平陽縣高麗有平陽君蘭鳳平陽今爲順天府朴氏固班班可譜然子孫徵其墓而其祀不絕自遯願公始公諱元象官至典書其字行履歷皆不可詳惟時序則自醉琴遡之當在勝國之末也考叔貞官大提母閔氏代言皆

之女公娶南陽洪氏其考彥猷亦大官封南陽君有四男郡事首生府使長生義盈庫使安生判官易生孫曰根樞楫仲林榮林曾孫則醉琴爲長正言引年正字耆年博士大年得琴成琴其兄弟子姪坐醉琴禍死殆盡世祖旋命公州東學寺僧徒設飯以食之其名並家僮皆載寺籍其遺皂僅有存者至公六世生員應臣監牧暹議置墓田每歲十月依家禮一祭之至今十餘世則稍頗蕃衍世振世輝等與崇古崇章就文等合謀樹石墓前以表之公之事實雖不可知然莫爲之源曷有其流哉公固以醉琴而顯亦豈公所積之報耶嘗聞露梁之南有墓題曰朴氏與

俞氏成氏者相比世傳醉琴與同死臣皆瘞於此仁祖嘗幸金浦有一士人立于其前謂治道官曰此忠臣墓地不可夷而爲道治道官遂不敢剗削云嗚呼其傳疑者猶且敬之如此况其祖先耶况其所嘗香火者耶古人曰愛其人愛其屋上烏後之人以此義推焉可也 崇禎乙巳十二月日恩津宋時烈述  
三司左尹郭公墓表陰記

此高麗中正大夫三司左尹郭公諱綬元墓也舊有小表止書官稱姓名而其下數十步有石焉刻曰宣德三年三司左尹郭綬元之墓在卯方守子及第珣以此溯而計之入我朝三十七年仍以前朝職

名終焉可謂偉然大節矣珣無後縣令珪之子孫今  
在懷德有曰連城栗谷李先生長兄叅奉璿其婿也  
生員琦子垠登第歷敷清顯出爲潭陽府使特 旨  
爲承旨未及赴 召而卒家乘所記如此云其子孫  
多在沃川郡其詳具載承旨墓碣焉

菊塘朴公墓表

永同之治西高塘里有墓曰故昌平縣令朴公諱興  
生衣履之藏也子孫多在其傍側歲脩祀事至于挹  
清公諱嗣宗則以學行聞於朝教於宗族鄉閭者無  
非文行之實故公子孫變蹶張爲詩書之藪由俊升  
而遊太學者項背相望豈公遺澤之所泊歟按狀曰

公字敬夫號菊塘早以文爲業十三中進士十七中  
生員蓋國初科舉與今異制也屢占大科解額竟不  
第所與遊金議政訓徐舍人皞及與從弟蘭溪并先  
生堧來往切磋又嘗樞衣於金桑村自粹之門桑村  
稱之以英敏牧隱李先生亦甚許之始爲驪興春川  
二教授訓誨詳明議論醇正遠近章甫多聞風而至  
永樂癸卯除昌平縣令寬簡以莅民清嚴以律己又  
明慎獄訟監司成公抑趙公啓生成以道內難斷者  
歸之公鄰並若權公踐閔公審言皆服其明信以爲  
不可及翌年遭喪解歸于永與弟監察興居居喪盡  
禮又築室於山水間相與湛樂焉徐舍人扁以二樂

年七十三而終配忠州梁氏知州事肅之女後繼以  
載寧康氏其考三司左尹熙也三子察訪仁蕃梁出  
也仁挺仁碩康出也仁碩贈叅判仁蕃無嗣今永朴  
之蕃衍者皆其二弟之裔公密陽人始出新羅王赫  
居世考檢漢城尹天貴祖成均直講贈贊成時庸永  
同之朴蓋遠有其緒矣余叔父習靜宋公邦祚之配  
鄭氏卽挹清之外孫而其子贈叅贊忠顯公與挹清  
蘭溪並享于鄉祠焉余亦娶于公之外裔仍與諸朴  
相厚今公七代孫生員承禧八代孫生員萬亨及第  
益茂九代孫生員濬哲託余爲銘云

松亭金先生墓表

先生出處義意師承淵源世則遠有所不敢知者矣  
聖朝拔之西鄙荒僻之中以爲國子蛾述之長前後  
四十餘年不離國子其學問之功作成之效槩可知  
矣故史稱其精於經書教誨不倦名士多出其門云  
又野史云金東峰時習詣先生受語孟詩書春秋然  
則先生之所受雖不足詳而其所授則實我東之吳  
泰伯也真可謂于光有耀者歟 萬曆癸巳 宣祖  
大王行幸本縣 命修其丘墓禮官致祭先是縣令  
朴慶先監司尹公斗壽因縣士之請以建書院未及  
妥備遭值寇亂而被燹其後尹公之子旰亟述前事  
又值虜變而廢 崇禎甲寅趙侯根復亨黜爲縣令

亟就墓前爲文以祭既又建石以表而以書謁文於  
余余諾而未果未幾士禍大作侯罷而竄而沒焉噫  
豈獨斯丘之不幸哉今者縣士郭以完以侯遺意來  
請顧余何忍終辭哉趙侯與余嘗讀朱子書熟講南  
康劉屯田墓故當時諗于縣士者皆是說也遂倣其  
制而作亭作門又近歲監司柳公尙運李公世華縣  
令韓侯志遠前後致力將新其院祠而請額焉諸賢  
崇報之意無有遺憾矣史又言先生與金文長公鉤  
金文長公未並稱爲三金而先生獨闕易名之典豈  
有所以而然耶史又稱先生嘗觀風上國上國學士  
見先生所作極加稱賞稱以先生其文章亦可知耳

蓋自殷師以至 本朝數千載澤斬教夷又以馳馬  
試劍爲事而先生能崛起其間能以經術導率使皆  
知方其功可謂盛矣趙侯識明學正而發揮先生者  
如此其至則亦可以知先生矣蓋嘗擬之於古人其  
陽司業施博士之類乎故撮韓柳二公文而書于石  
曰嗚呼斯文遺愛罔極高四尺者先生墓耶

監察 贈左贊成李公墓表

坡州之斗文里曰監察李公申氏祔葬墓者栗谷先  
生之皇考妣也有誌文焉聽松處士成公守琛作也  
有云公悃悞無華不與物競休休樂善有古人風噫  
盡之矣申氏平山大姓己卯名賢命和之女資稟絕



異習禮明詩至其書畫之類亦臻其妙得之者如寶  
拱璧焉公得此賢配克生大賢語云黃流不注於瓦  
噐意者公之潛德不止於聽松所稱歎公諱元秀字  
德亨以蔭入官止司憲府監察 嘉靖辛酉五月十  
四日甲子周而卒以先生貴 贈贊成申氏亦 贈  
貞敬夫人其系出俱在先生碑表男長璿叅奉次璠  
栗谷先生其第三而季曰瑀亦有名於世女壻直長  
趙大男僉使尹涉士人洪天祐叅奉生景震景恒皆  
叅奉女適別坐趙德容璿生景升景井栗谷先生側  
出教官景臨景昂女爲金文敬公集側室瑀生景節  
官司議贈承旨女適鄭維城權尚正權察訪也穉景

震出耘典簿景恒出翊府使景升出翮翊翮翮景  
井出郡守穉橋穉景節出內外曾玄甚蕃而郡守之  
子東溟文科侍從與京外儒紳議曰栗谷先生之葬  
在公墓之後先生承洛建之淵源闡東魯之統緒將  
與天壤無窮則公之名亦與之無窮然衣履之藏不  
可以不識遂立石于其前

### 丹陽郡守閔公墓表

吾東閔氏出自驪興而其顯者皆本於門下平章事  
文景公令謨至其玄孫文仁公漬以藝學著名公其  
十世孫也曾祖永慕順天府使祖宗元永柔縣令考  
子芳 成廟朝尚主爲驪川尉 正德五年庚午生

公諱希說字良弼 嘉靖辛卯以蔭補官爲江東狼川聞慶三縣監通禮院引儀南原判官終守丹陽郡則 隆慶壬申也 萬曆元年癸酉正月二十三日卒葬于富平鵲洞負良之原贈吏曹叅判配完山李氏 世宗大王之後其考司果義蕃也長男弘俊倉守次毅俊次士俊府使次廷俊縣監季誠俊四女婿監察沈錦判中樞李輅知中樞許潛郡守徐諱也內外孫十九人曾孫六十八人玄孫二百餘人至今五六世則多不可勝記府使生靜嬪有小星之德而膺螽斯之慶其餘諸派亦多名公巨卿其最顯者府院君李光庭左議政沈之源領議政洪命夏也而我

慈聖殿下中殿殿下皆外裔也其家狀詳於世系除拜而其言行不可考也然以其子孫之昌大則公必有隱德陰功厚積於身故其發於後者如此此可以知公而爲爲善者勸也今玄孫而周告於今左議政閔公鼎重國舅驪陽府院君維重暨朗善君俱朗原君侃曰今去丹陽公没百有餘年而墓前無表諸公皆是此祖彌甥盍相與圖之遂相與請銘於余余曰公出自天潢而又爲 王家毓慶此多又文王以寧益著於所不知人尤不可使無傳遂書其事如此云

龜城府使趙公墓表

林川趙氏爲故家大族始自高麗嘉林伯天赫七傳

而本朝嵩珎成均生員是生諱瑤通禮門奉禮郎  
是生諱元卿成均館司藝其子曰翊承文院叅校娶  
大司憲閔暉女生公公諱應忱字李亨公兄弟四人  
皆以文第顯公獨悅孫吳法始蓋以門蔭入仕竟從  
武科發身卽除宣傳官歷典价川平山豐川南陽最  
後爲龜城府使年七十一而卒于萬曆乙酉二月  
五日墓在坡州惠任峴北數喚丑坐原公所至皆以  
忠信爲主將遞民必齊聲願留以故秩滿而不能去  
初娶全義李氏其考世霖繼以全州柳濂女凡有四  
男二女曰璋曰璜李氏出曰城曰璫女爲郡守金畏  
天司諫金堯立妻者柳氏出璋贈左通禮璜一女適

監察韓積城男仁賢仁輔仁賢出後通禮實主公祀  
贈承旨璫男仁吉仁熙公後承至今五六世而惟承  
旨子孫蕃衍而有文行其玄孫世煥早登文科爲監  
司贈其考諱碩吏曹叅判退之有言孰豐其川不羨  
其源吾於公亦云今去公世幾百年其履歷功令俱  
不可詳而不有積累陰功有孚有徵則其發於子孫  
者能如是哉監司與余善余多銘趙氏墓公實委趾  
於後而余乃推本於公云

忠清兵使尹公墓表

坡平尹氏自高麗大師士大夫不絕國朝尤盛有  
以武藝發身官至兵馬使者曰先智字汝晦公少讀

經史不肯竟年二十六登武科歷官二十五內則由  
宣傳官歷刑戶曹正郎司僕寺判官副正尚衣正擢  
授承政院承旨自同副至左副同知中樞府外則長  
淵縣監永川郡守花島僉使定州牧使安東府使於  
京畿爲水使嶺南爲防禦使左右水使而爲右兵使  
者再湖西爲水使再爲兵使以卒高祖希齊叅議曾  
祖培掌令祖師殷監考倬左尹兼成均事以經學  
己卯盛際見推諸賢間妣清州韓氏縣令士信女公  
旣名父子性且謹廉以故所至俱有聲績尹元衡張  
甚公與有連袂絕不通問元衡銜之多所挫抑然公  
清操素著故卒未有以傷之也公再娶皆平山申氏

女三男曦暉昱女婿李挺臣而暉昭駿駒及女三  
人側出也曰忠世孝世貞世安世昌世弼世輔世洪  
聖民姜先慶李復亨閔慶麒李東馨李淹金松元許  
怕孫男若婿也庶出慶世奉世命世應天命天從天  
弘世冠世光世及女七人也曾孫燭煥炯炳燮灼燧  
煌烜燿熿赫烜燭燿燿則金械南大源辛成立安斗  
明安斗文朴謹宋熙祚姜胤祖崔克良而燁煒燿燿燿  
燿煨烜燿燿燿燿燿恐有誤其庶女若干人  
諸房下今各四五世或六七世殆將數百人而名公  
賢士前後相望何其盛歟公由武資擢居喉舌儕流  
莫敢望焉出爲三道軍帥不可謂不顯而視德猶未

故以其餘貽其後愈久益昌俾令聞長世其視祿豐  
位躋曆短名湮者何如也公以 弘治辛酉生其卒  
在 隆慶戊辰十月十六日墓在長湍清平院先夫  
人同原異室後夫人別葬銘曰

牛虎之力而用以自守故權貴莫能奪也雕隼之擊  
而歛以退讓故有君子之節也德隆而位細故條葉  
愈遠而愈遠也惟墓石我篆其陰後百世而可質也

贈領議政平洲府院君申公墓表

平洲君申公沒九十六年而墓無表他人墓雖無表  
尚可其公墓而終可使無徵耶公諱華國字德夫高  
麗大師壯節公崇謙之後 本朝左議政文僖公槩

之玄孫文僖生觀察使自準觀察生典籤末平典籤  
有子曰錦吏曹判書謚文節己卯諸賢相與推重焉  
娶宗室富林君湜女 正德丁丑二月廿二日生公  
萬曆戊寅五月初十日公終焉公名父子氣宇軒豁  
心志堅貞篤學力行克世家聲又文章粹然儕輩莫  
望焉嘗就場屋取丙午生員仍復不屑也配尹氏僉  
正懷貞女有淑德焉與公同葬衿川三聖山負辰之  
原長男礪文科策扈 聖勲封平川府院君礪監役  
礪砧皆武科砧平北關寇亂官至判尹後死事季兵  
使監役嘗上章訟栗谷牛溪兩先生 宣祖禳之并  
美判尹公北功女適贊成具思孟次僉知安景濂次

柳澹公之子姓至今有五世六世者摠四百餘人而  
章陵 仁獻王后卽具贊成女也實誕我 仁祖大  
王仁祖靖社時公孫景禎景裕景裡曾孫竣贊成男  
宏孫仁厚仁壆外孫沈命世洪振道振文等陳力贊  
謨咸啓封號噫其盛矣其餘簪組不能盡記程夫子  
嘗謂靈芝醴泉亦不無本源雖茲興運自天啓之而  
其毓慶儲祥以助鴻休者實公所積之善與有大焉  
者矣而公墓可使無徵於後焉哉公嘗除別檢而不  
就仍遺戒勿以題于廟主故今表亦只題追典封贈  
云時 崇禎紀元四十六年之癸丑九月日恩津宋  
時烈述

### 香湖崔公墓表

有與栗谷文成公生同鄉里聞道於退溪文純公觀  
德於牛溪文簡公生爲賢士歿而祭社者曰故香湖  
崔公諱雲遇字時中也公生于 嘉靖壬辰年廿一  
以生員游大學以薦入仕歷十官多不就亦不久  
淹終爲橫城縣監卒于 萬曆乙巳蓋公旣生長于  
君子鄉早有求道志往謁退溪于陶山得聞古道則  
爵祿不入于心又登炙于坡山則牛溪甚推許焉公  
往來講磨益知有用心處退溪與人書勉公以韜晦  
避人指目栗谷與書曰學者不致力於窮格則無以  
見實理之本某以是告于浩原今又以聞於左右浩

原牛溪字也又曰如兄寬裕渾厚外無甚異人誰指  
笑而退溪諄諄於韜晦惟左右識之牛溪亦以讀書  
持養責勵焉公之淵源所自可見矣嘗爲 宣陵叅  
奉以職事上疏請於 列聖陵下各立表石以爲千  
萬世無窮之慮又因言 神德王后廢陵不可不遷  
祔於 健元陵蓋己卯諸賢只復 昭陵而不及於  
貞陵識者恨之故公瀝血言之其後我 顯宗大王  
幸追來孝樹表于 寧陵又復修 貞陵以慰神人  
之心公之見識忠誠悉行于 聖世矣古人云求忠  
必於孝推是以觀則公之事親之孝因可知矣故生  
而愛日不甯宦遊雖以親命略就而旋即歸養歿而

喪盡其戚祭盡其嚴至於戒子以聖賢爲法爲書以  
戒宗族者罔非孝義之道也宜其鄉人化服俎豆于  
祠也嘗以時務獻于栗谷當路時栗谷恨不能得其  
挾助然則公於世事留意深矣亦可謂仁人矣公世  
爲江華望族六代祖文漢爲高麗忠肅王駙馬知國  
將亡遜于江陵子孫因居焉高祖允行直長曾祖自  
霑登第以侍從卒官郡守祖世楨縣監是生教授澹  
進士浩教授公娶晉州姜氏生公而進士公子之自  
幼有不忍心見羣兒捕魚輒潛捨之有行僧見之抱  
置石上拜而去十四其仲父演黨於乙巳姦兇公累  
以書諫之可見其高明而夙成矣公配江陵金氏士

人昌壽女古溟州郡王周元之後二男長景璿次景  
瓚一女適崔復慶景瓚子堅徹仁徹智徹智徹爲景  
璿後其子順慶女適持平金世行仁徹子順成順道  
順道出繼堅徹內外孫多不能盡錄公位未甚顯其  
所抱負不見於世而觀其求道之心甚篤而諸老先  
生期許之重則不但爲一鄉之善士矣惟丘山書院  
實公所創而直犯聖諱人或疑之然退溪先生以詩  
美之斯可以無惑矣今順慶男海雄介於今左議政  
閔公鼎重來求墓銘余旣慕其遺風而竊念公服習  
於栗谷而余先師金文元先生實栗谷之適傳故議  
政公不鄙而命我耶遂不敢辭焉銘曰

聞道于陶覲德于坡魯無君子斯取斯耶

贈正郎閔公墓表

余多銘閔氏墓嗚呼其世遠矣哉珪組聯仍以序而  
公獨無一官以書其墓使其不如古今人則可矣而  
知公之有隱德者蓋莫不惑焉蓋公天資厚善有孝  
友性人與處無不懽愛居鄉以長者見推嘗爲貢舉  
業不成閑居靜養惟子弟是訓嘗在湖西土賊夢鶴  
執棘矜剖官倉以誘飢民之走死者遠近塗集公拘  
禁鄰並使不得從亂且諭以逆順使與己跟捕賊平  
其投入者薙獮無噍遺肉餒狗鼠而其聽公者故按  
堵如故朝廷撫綏有加公之及人者亦不少矣配李



氏亦仁淑聰明幼聽人讀書雖大篇一經耳輒上口成誦焉噫公之德善既沉晦不見而湖西事只身後五品秩而已李氏才識亦足爲良轉運而只以寒士妻終焉其長子進士構早卒其季子根有文而不第以歿一女適人無育天以是安施也耶獨惟仲子幾出爲伯父後闡科名以清謹顯官至府尹而其子光勲擢壯元及第官觀察使其孫著重鼎重維重並藉文譜敷歷清俊之選而根之子光燭亦以文藝出身方爲時用其二兄光焯光尹皆通朝籍二弟光燧光斌讀書爲士公之後蓋振振乎昌矣天之報施善人不於其躬而於其後者蓋於公益信而公之非不如

古今人者於是乎斯可徵矣公諱汝俊字英伯年六十一卒於萬曆己亥五月十八日李氏三十三而卒於乙亥三月三日其氏出世德具載公之祖贊成公碑故不復著焉光尹爲進士公子實主公祀毅重誠重明重爾重最重其出也李氏太宗大王之後世宗大王母弟補五代孫其考忠義衛敬宗云爾時崇禎戊申六月日

軍資監正李公墓表

栗谷先生有弟曰瑀字季獻號玉山嘗居嶺南之善山善山人稱以四絕謂其琴書詩畫也其書法尤妙嘗於胡麻子書作龜字又劈豆爲兩片書五言絕句

於其一而不失其結構趨勒之法 宣祖大王嘗加  
愛賞以草訣百韻手題冊額而賜之其他錫賚甚多  
然其四絕終不能掩其人故先生亦不稱其才而稱  
其人曰使吾弟從事學問則吾所不及中生員試初  
補慶基殿叅奉不欲遠離先生不就其後水庫別坐  
司僕寺主簿比安縣監司憲府監察尚衣院判官槐  
山古阜二郡守皆其履歷而以軍資監正終焉則  
萬曆己酉五月二十七日也得年六十八公在郡縣  
不任刑杖吏民愛戴比安人秩滿而願借故居比安  
凡七年矣嘗再中庭試皆以微眚見下公曰命也自  
是不復赴舉丁憂廬墓親執滌漑冬月手爲皴裂出

血庶毋嘗不慈而猶愍然出涕公輒縮手袖間不令  
見之故袖爲染赤先生築室于海州之石潭暇日先  
生必置酒使公彈琴詠詩日夕湛樂兄弟間自謂知  
己先生沒妻子飢寒朝廷爲授縣職以養之公盡心  
撫育俾不失所然未嘗自營家業故常僦屋以居其  
所畢命梅鶴亭者亦其婦家別業也槐山時值倭變  
募丁壯設機捕捉而以功與吏卒又偵賊向背而使  
民乘便耕種以故仍以飢饉而闔境俱全朝廷錄其  
功賜宣武從勳墓在善山舞萊山負壬原淑人黃氏  
祔焉黃氏甚爲其考耆老所愛旣行李氏家稱之男  
景節官司議二塔鄭維城權尚正尚正察訪司議生

郡守穉次穉穉女適李萬謙鄭維城生玄升德升元  
升女適府尹朴守弘金擇善權興文金時閔權尚正  
生鏹鉤女適察訪黃立顯沈庠府使金厦樾郡守男  
東野東溟東維東柱東魯東溟登科爲侍從官女爲  
李輝妻內外曾玄甚衆不能盡錄噫以公之高才偉  
器其見稱於人者皆公之一偏而非其至者然人猶  
不可及况其蘊諸中而行諸事者乎噫曾無君子斯  
焉取斯

金城縣令尹公墓表

坡平之尹始自高麗壁上功臣莘達至諱瓘以伯開  
號謚文肅 國朝有諱坤佐命封坡平君謚昭靖昭

靖曾孫宥牧使玄孫應奎僉正是生叅判諱仁涵以  
清名峻望爲 宣廟朝名臣公叅判第二子也幼時  
不與羣兒戲凜然早成得一美味必先以獻之父兄  
盖天得也常有蜂入懷而螫焉叅判公方置前課學  
公整疊其書從容起去解衽脫放之時僅七歲矣叅  
判公大竒之稍長游栗谷牛溪兩先生門旣而時論  
大變兩先生酷被誣詆公不樂交游常閉門自守丁  
叅判公憂廬墓以盡喪伯氏正郎公某繼沒家事零  
替遂以夫人命就場屋年三十取進士四十四捷文  
科占第二名例拜直長公爲進士時太學欲爲牛溪  
先生伸白諸生皆畏忌莫敢先唱公毅然當之累疏

堅懇至是遂積清選遷主內贍及中部簿公名家子弟才行度越而其困踰如此公悠然不以爲意未幾辟調度使從事不就除金城縣令遂奉尊夫人赴官盡心撫摩兼修學政公暇必靜坐看書已而棄歸翌年壬子三月十三日卒有以家事問者公曰吾有母不得終養他尚何言哉公諱弘立字可守壽五十公所守卓然始通籍有貴倖慕公聲譽遺以朝衫公却不肯受在金城清潔如水檠聞境內有山水稍佳則輒遇興獨往若遺世出塵者沙溪金先生適宰隣邑每匹馬相從暇日同遊皆骨脩然有南嶽唱酬之勝平生素相與唯金文敬公暨余叔父習靜宋公南溪

趙公廷虎數人而已申象村欽晚遭 仁祖盛際每歎公才學之未展也五月葬于坡州龍池洞負良之原淑人趙氏祔焉淑人豐壤人高麗侍中孟之裔典翰宗敬之孫司藝廷樞之女秉心柔而執德貞六親稱之年七十卒于 崇禎辛未正月十八日長男惟健進士有名士友間有子長卿飛卿國卿直卿皆進士長卿蔭仕爲奉事飛卿登第爲掌令次男惟敏女適進士李晚生飛卿生明遇進士齋郎明運明遠國卿生明義明道直卿生明保明翼明徵內外曾玄孫若干人余習靜公從子也既有朱陳契又游掌令父子兄弟間余故與爲銘銘曰

大往小來 宣廟季年羣枉誣賢不寧孔熹孰奮以  
身以直其寃公游國庠師友淵源其在于漢如郭太  
原尺疏屢封以叫 天闔斯文吐氣衆邪側目敲撼  
挫握終以困統一時之厄百世之光凡後之人視此  
銘章

長興庫令 贈叅判閔公墓表

此鳴牛里者漢師東郊外閔氏之葬也此四尺封者  
長興令贈叅判諱汝健字強伯之所藏也其左而同  
穴者姜議政士尚之女配也其上四步五尺而位者  
郡守思容而考也又其上五步三尺者贊成齊仁而  
祖也其下三步四尺則 贈正郎汝俊而弟也其神

道大碑螭首龜趺者贊成公事實之刻而氏譜世德  
之所載也去生年四十八 萬曆乙酉之仲冬廿八  
其卒之日而七十二辛亥孟冬之初十其配之卒日  
也由部將歷主簿監德山新寧二縣而稍陞庫令者  
其官秩也幼而喪母事父與繼母甘旨無闕撫愛七  
弟三妹昏娶以時居喪廬墓三年其行實也正郎公  
之第二舉府尹機以清白名者其嗣子也觀察使光  
勳若吏曹佐郎著重大司憲兼大司成鼎重忠清道  
觀察使維重孫與曾孫也蔡應教慶先承旨忠元判  
書裕後其女子子之婿若子若孫而顯者也其三尺  
表者府尹公之顧言而著重兄弟之所豎也其述而

書者著重兄弟之游恩津宋時烈宋浚吉也其年月日其卒之八十三年 崇禎戊申七月日也

掌苑署別坐韓公墓表

清州韓氏爲東方大姓皆祖高麗太尉蘭自太尉歷十九世而至府使琦取明經第以不能媚權貴不大顯公府使之第二子母南原梁氏少才名絕等夷隆慶元年舉進士 宣廟壬辰倭奴充斥 車駕西幸士民皆奔竄以自保公奮曰 王室在難吾雖布衣何可只爲身謀卽杖劍詭行至龍灣問 上起居諸公見公辭氣激烈無不歎賞卽除掌苑署別坐翌年春寇退公遂拂袖歸諸公惜其去旣不可留則皆

以詩送之公旣歸懷德日與縣人修黌舍糾鄉俗鄉人推以爲山長公作亭山水間圖書自娛金南憲玄成題以月浦旣而公謂人曰聖人事旣不可望其壽年幸同則亦榮矣果以七十三而卒實 萬曆甲寅七月二十一日也公居家靜默子弟不敢仰視儕輩雖喜狎者亦不敢慢其子嘗以麗服見公使侍者脫而毀之曰是身災也其嚴如此公諱日休字景逸祖永年曾祖泰皆不仕配坡平尹翰女生男峻文科學正三女適學生鄭燾縣監李泰吉叅奉柳大朋側室女金珥妾學正生四男震英別坐次命英得英士英內外孫甚多而典翰李壽仁縣監出也墓在清州治

南雄洞今主太尉舊墟者公之曾孫益亨也銘曰  
允矣公之爲義急病讓夷彼巧於趨避者能不忸怩  
且也委命者不惑自信者不疑吁嗟乎韓公可謂庶  
幾於斯

海狂處士宋公墓表

湖南古多魁偉賢俊之士其不遇而抱負以死長爲  
志士之痛者又無如海狂處士者也處士名濟良字  
以仁洪州人當倭寇創殘之餘痛憤陵寢之變上  
疏數萬言其文汪洋放肆使人望洋而其義正其猷  
遠蓋以忘讐修好爲辱保良養兵爲要而間有奇謀  
異策出於意表者又爲一冊子名曰臥薪記請於道

臣以進則道臣格不聞遂乘舟入海與世相忘耕鑿  
訓誨高尚其事自號曰海狂蓋旣沒而女壻權石洲  
鞞自漢師千里來哭錄其平生言之卓卓者書在  
紙上曰庶幾吾舅名不沒於後世也處士生於嘉  
靖己酉負氣不羈九歲其考凶音遠至徒步卽發足  
繭氣竭不食者五日事母夫人至孝及喪歆粥三年  
後讀聖賢書最深於易從李土亭之菡游土亭謂曰  
有一字萬變之理公潛思不置後至瑞石山入靜乃  
悟曰此洛書法豈朱子所謂肇其變數之用者耶然  
他人莫得其詳也公不事生產樂弛置自便然甚謹  
於禮日必早起謁廟夫婦必相拜出入迎送男僕不

敢入內庭與女僕不親受授教諸子甚嚴雖女子必通小學孝經列女傳石洲內子少時氣或惰慢則惕然危坐曰豈可以暗昧惰行乎姑母遠居必一月再往省嘗欲斬祀木爲舟徧遊海島村人事祀甚謹爭來止之公不聽忽役夫多立死者爲文以責之曰刳木爲舟制自軒轅死者皆立蘇舟成遂入海遇風幾覆者數又猛虎羣吼而略不怖嘗至一島舟敗路絕不食七日而猶不怛死忽有船自遠而至而亦無喜色倭寇至與梁山龍山疇等謀起義旅所推者金健齋千鎰趙重峰憲高霄峰敬命諸賢也時金忠勇德齡丁憂在家公中表也公勉起之又入濟州求駿馬

以授之忠勇旣起賊不敢近又往見天將楊揔兵元楊疑其爲倭謀將加害公神氣自若楊固異之矣閔監察純適在楊營急告曰此東國高士宋某也楊驚起自解縛引坐問策公曰兵家以得地形爲策急宜移陣楊不聽俄而果敗公疾革命左右扶起正衣冠北向長跪而卒是萬曆壬寅二月廿七日也墓在光州瑞石山綾城洞良向之原公之系曰曾祖麒麟官縣監祖駒司憲府監察考庭箕文科正字妣金氏其考允敬也公初娶朴氏訥齋先生祥之孫監役敏古之女繼媿金氏務功郎大亨女男女各四人柁朴出也甚有孝友行倭寇時被執載船乘機奪倭劍



擊殺之殆盡有一倭投海而泅率衆倭以來遂自投  
水二女婿梁愿容金克純也檣楫楫及女適石洲及  
梁孝容者金出也檣亦奇士奉父母避倭山谷賊迫  
父母所匿自林藪出走故爲倭所得以免其父母既  
入日本賊將愛之粧美女三人使自擇終不冑受後  
從信使歸國與兄柁俱載石洲所記柁孫堦爲進士  
公始以濟物濟時爲心既知其不能則於其名去偏  
傍爲齊而字曰士役盖曰士不能得時行志則寧爲  
編戶服田以供賦役而已何必獻賦求仕哉此公之  
平生始卒也噫以公之志之才爲世所用則其事業  
必有大可觀者而只恁麼死了天之所以生公者抑

何意歟然其未達之疏大義炳然晦翁所謂天經地  
義民彝萬世必報者昭揭宇宙亦以愧夫南渡委靡  
之君臣公亦不可謂虛過百來年者也昔韓文公以  
女嫁名人刻人之墓公之以意氣相感得石洲爲婿  
亦足以留名况其赫赫者著見於今與後者耶雖然  
微石洲烏能闡發如此哉檣之孫奎介於村真谷尚  
玄來請墓石之文云時 崇禎旃蒙赤奮若孟春恩  
津宋時烈述

尤菴先生文集卷一百三十八

尤菴先生文集卷一百三十九

墓表

學生金公墓表

士有志行高古朝家遺失而師友推重身世埋沒而  
文采表著者曰故學生金公諱宗儒字醇仲也公世  
居善山旣長遊漢師與人少許可取友必端旣而服  
事牛溪先生質疑問答先生甚重之金文元公先生  
與之友善焉公德業方集而不幸天嗇遐齡士友嗟  
惜焉後仁弘與其門徒醜詆牛溪先生誣引公爲證  
公子輦上疏辨明之時 宣祖大王方倚任仁弘批  
辭甚峻殆百餘言盖仁弘之意以爲公名重當時不

以公爲證則人不信之云爾公孺染庭訓早從師友持身甚謹御家有法嘗遊嶺東歸謁牛溪於坡山先生爲錄其語於雜記中守夢鄭公擘平生友也奉使南下祭于公墓而文逸不錄李叅判廷馨記公於善籍中玄石朴公世采所纂師友錄中述公名蹟公之淵源益可徵也槩而論之公其郭有道之倫乎公善山人考諱就文司諫院大司諫受業於朴松堂英之門下學有淵源祖諱匡佐 贈叅判曾祖諱碑 贈叅議其始譜者曰高麗牧使諱起公妣李氏縣監仁符之女監司禮孫之曾孫廣州大姓也配俞氏進士諱綸之女判書謚景安公汝霖之孫俞氏性嚴有法

度子女有不率者切責不少假婢使有行不謹者輒逐去之蓋暗合於溫公家儀也長子卽輩次日翽皆官教官二女婿崔衡李重生崔配遭亂立懂事聞旌閭亦可見其所自云長房男挺義挺善挺一次房男時閔時顏內外曾玄摠百餘人公生於 嘉靖壬子没于 萬曆壬辰墓在金烏山東麓卯向之原卽大諫公兆下孺人別葬同府店峴山前妣仁川李氏兆下謹按善山志曰公志操雅潔不同流俗又記其師友源流古語曰不見其山願見其木真非虛語也

同知朴公墓表

公諱廷老字汝獻生有異稟聰敏絕人嘗隔壁聽人

念書歸記之盡卷不錯一字人以爲神平生未嘗借書於人輒至其家一閱終身不忘爲文操筆立就脫口輒數千言屢舉鄉解輒屈於公車旣而又不屑也仍自號懶學子公叔父嗣宗有學行人稱挹清堂教公甚有法度時重峰趙先生以言事退斥田里公與弟廷亮首往師事之先生少然可亟稱許焉鄭仁弘被徵屢過鄰境或勸往見之公終不肖及仁弘肆惡人始服公嘗以書問禮於寒岡鄭先生考据精博先生歎曰世有斯人耶沙溪金先生講道于家公宿卷往從之質疑請業先生稱以老友答問窮晝夜不倦公旣從諸先生遊趨向甚正聞見益博而尤長於禮

學鄉鄰矜式資問者帖帖性至孝常辨色而朝夜則安置躬自漁釣甘旨無缺居喪廬墓三年國俗服禫以素公曰非古也用淺黑色忌日常如袒括之日終日色慘家人不忍問以事鄉人舉公行義于朝十餘事然世無有力者推挽故卒以無成嘗以優老恩階嘉義大夫行副護軍年七十九 崇禎辛未十二月十一日卒將卒神氣不爽命侍者扶坐侍者扶而號泣公目已瞑卽微視曰毋遂儼然而逝公密陽大姓其源蓋出新羅氏中世有大提學時庸娶致仕金令貽女因家永同曾祖諱巖兵馬節度使祖諱有林司憲府監察考諱起宗副司直妣豐川任氏公娶高

敞吳氏高麗學士學麟之後 贈叅議沆之女先卒  
而合葬焉公多舉輒不育有一女適贈叅判李德泗  
側室子曰溢叅判一男泰淵文科原任觀察使三女  
婿宋時烈鄭墉李天培也觀察使將樹石謂余曰子  
贅吾家熟知外翁事其記之余不得辭而略叙如右  
時公沒後三十六年丙午四月日也

鳳山郡守

贈領議政完山府院君李公墓表

公諱郁字質夫 世宗別子廣平大君璵生永順君  
溥永順生清安君嶸清安生定安副正千壽自是屬  
益疎子漢孫仁健始自己致爲郡守縣監公縣監公  
子母沈氏領議政連源女公早孤能自植立初仕爲

齋郎八九遷止鳳山郡守常誦小學書以書中八事  
自戒故號八戒治家任官必盡其方當廢朝時目見  
宗國將亡痛念悲傷以至于終人謂公篤厚君子也  
夫人長水黃氏慈惠溫柔父廷或府院君上祖喜  
國朝名臣事載之史 嘉靖戊午公以九月廿六日  
生夫人生于其四月十二日 萬曆己未七月十九  
日公沒九月初四日葬廣州光秀山夫人沒于丙辰  
十一月一日次月庚申葬異穴同塋皆向坤廣平以  
下六世墓皆在焉子厚載僉樞厚培府使厚源策靖  
社功登第爲右議政封府院君側出厚根司果僉樞  
男迴文科掌令府使男迥議政男週縣令運僑而天

選文科留守女壻府院君吏曹判書金錫胄弘文修撰朴泰輔也掌令七男重輝郡守永輝縣令益輝縣監時輝進士廷輝業儒晚輝武科府使遇輝業儒郡守男濡文科承旨內外曾玄總五十餘人公以從勳始 贈承旨後以議政 恩累贈至領議政完山府院君既又推及二世縣監爲贊成郡守爲吏曹判書三夫人一隨封自別宗數百年公以絕倫人地宜達而望歸成後人而議政公銜訓趾美贊運宅揆薦榮三代旣顯以有而子孫又益蕃衍蓋所謂善無不報而遲速有時者歟其壻鶴谷洪公瑞鳳誌之其碑象村申公欽銘之記其表而書之者議政之友恩津宋

時烈也其年實 崇禎辛酉也

生員朴公墓表

平陽先生朴公彭年居于懷德治南興龍里其宗族多在其傍近有曰應臣字忠伯其曾祖引儀得琴於先生爲再從兄弟是生敬友敬友生思尹皆齋郎公以 嘉靖己未生其母清州郭氏也公少孤及郭氏沒善居喪又考禮家說歲祭於遠祖墓 萬曆戊子陞上舍自光海朝不復就場屋以授徒爲事 天啓甲子以疾終焉配殷山申氏副尉倣女先沒而同窆于縣南雪朗里男近仁孫尚蘭以次陪葬焉公四女適主簿申愉忠義衛李嶷察訪韓尚儉將仕郎宋賀

昌四氏子姓蕃茂頗仕於朝尚蘭子女別載於墓石  
噫公累世不振幾不成百年之家而公能盡其誠孝  
聿追遠祖修其墓祀使知來處已足以光前裕後而  
况平陽先生以忠義大節振輝今古使世之人皆知  
有平陽之朴則先生之庇覆宗族亦大矣東國朴氏  
皆出新羅王其籍平陽者蘭鳳其名也平陽今爲順  
天府云時 崇禎甲寅十月日

司禦贈左承旨尹公墓表

司禦尹公諱泳字大游有孫曰理闡大科出入從班  
由承旨爲慶州府尹府尹秩視亞卿追榮三世公爲  
承政院左承旨經筵叅贊官公坡平人高麗壁上功

臣莘達始大顯累公累卿德烈彌隆 本朝領議政  
仁鏡無嗣取其從兄郡守仁復之第二子倪爲其后  
卒官折衝僉使 贈兵曹叅判是生諱思欽慶尚左  
水使娶海州鄭氏直長承胤之女公以 嘉靖壬戌  
五月十二日生三十舉司馬仍克於公車蔭仕爲  
奉陵叅奉歷數官陞授典獄署主簿歷司憲府監察  
除安陰縣監丁內艱服闋拜陽川縣令戊辰拜 世  
子翊衛司司禦年八十八而沒于 崇禎己丑十二  
月二十四日葬于連山東大菴山松泉寺右偏巽坐  
之原公天資沉毅前後莅官吏憎畏晚年歸臥江  
湖以享寬樂清勝之趣觀者莫不豔稱焉配長興任

氏其考故不仕諱諒也後公三年而生先公十一年卒而祔焉長男熙善武科宣傳官次揚善季止善二女適權仁復金瀨側出萬善叅奉長房子珩次房子璿穀頊珪璿進士女適田有成三房子琪琬玼瑾理二女適金震鏃蔡生晚權仁復五子文佑文伯文倣文似文佐金瀨男宇慶庶出孫瑚璉內外曾玄百餘人多不能盡錄嗚呼以公之資飛不盡翰低回蔭調沉晦而沒可勝惜哉雖然晚享清福壽至大耋子孫多而且顯天之報施此其徵也夫時 崇禎著雍執徐孟冬日德殷宋時烈述

昌陵叅奉郭公墓表

郭氏爲善山大姓按譜光祿大夫佑賢自玄風移封於善云 國初三司左尹綏元始居沃川九龍村子孫仍家焉墓在沃川赤登江上基谷里表刻尚在其子生員琦其子垠爲潭陽府使以承旨被 召而卒潭民如表父母巷哭聲相接其子生員之楨其子從仕郎語其子引儀自堅承旨夫人申氏實栗谷先生外黨故引儀公號栗谷爲兄娶察訪鄭惟馨女生公公諱鉉字公舉自少有當世志三十八成進士後屢取省試解或居上游竟不第嘗築室靜居扁以三安又取躬自厚薄責人揭壁以自警自以早失怙恃不得伸其誠孝每遇忌日必啜粥以致哀性不喜華靡



故家產稍贏則鄰族之孤貧者輒資而嫁之人以爲  
難鄉人舉其行義 仁祖朝除 昌陵叅奉不就辛  
丑閏七月十四日終于家年八十七配洪氏南陽名  
族性明爽能守舊家流風先沒而祔焉其考世贊軍  
資監正男文浣娶學正鄭弘緒女生子櫓楷女適黃  
鐘後娶李汝楨女生子彬文漢有俊才早夭文溶今  
察訪娶持平柳祿女生子繁榮女適生員成虎拜文  
涵娶察訪韓克昌女生子樞士人李恠今聞慶縣監  
趙汴公二女壻也聞慶男字鳴宇衡女適李宇寬公  
甚有執守光海時嘗至京師所寓近賊臣許筠家筠  
求與相見公卽移寓以避之族姪朴鼎吉謂曰叔欲

取第耶頌一見廣昌廣昌卽爾瞻也公終不肯少出  
入重峰沙溪兩先生門下沒身景慕焉余先妣於公  
爲再從親先君睡翁公落南三十年與公交歡終始  
不替余自髫鬣受公教督自今追思則先輩風誼非  
今世所有也公嘗草萬言疏欲上而不果今之從政  
者或取而觀之不能無補也

龍溪處士李公墓表

我 宣仁世國有高士曰李公諱榮元字子善公侗  
儻豪爽不以俗自累其爲詩俊逸清越與權石洲任  
疎菴諸公友善爲清歡契清陰文正公兄弟亦推重  
焉沙溪文元公愛公寡欲勉以從事儒學 宣廟朝

孽臣等結奧援得志黨與甚盛公愍歎宗國之危上  
疏極言人頗危之而公悠然也 宣廟竟容之時稱  
頌 聖德家產不貧急人之窮甚於己私又與族黨  
倣范文正遺法立義倉以濟寒餓俾治喪祭 仁廟  
卽位羣賢滿朝薦公行義朝家將大用而公則下世  
天啓癸亥五月九日也享年五十九再遷墓墓在牛  
峰聖齋洞公從弟九峽公諱春元 宣廟朝名臣也  
清陰文正公因銘其墓而稱公曰某詩名與公弟長  
晚自韜養爲儕流所許俱薦行誼徵用之未就而卒  
趙玄谷緯韓挽詩曰河清會待調元手其奈箕精掩  
海東觀此銘詩槩知公之大略也公咸平人高麗神

武大將軍彥其上祖也 本朝左通禮世達縣監允  
宇郡守璜寔公曾祖祖與考也妣全州李氏其考曰  
生員毅也配牛峰李氏叅奉愍之女一子斗陽官至  
牧使二女適士人李峻發牧使韓壽遠繼媿南氏生  
鳳陽女適士人朴大有至今內外曾玄甚多而其顯  
者府尹韓聖輔持平韓聖佑監司尹敬教也牧使繼  
後孫華相有文行收拾公詩刊行於世而又請公狀  
於其生親縣令公以壽其傳縣令公名之濂字養而  
以公族孫夙慕公風誼今其文質而不華矣竊惟公  
以凌高厲空之氣盖世絕人之姿謝脫塵俗日哦於  
泉聲山色之中斯乃遊方之一外臣而顧乃憂時閔

俗進言君父之前立約收族俾不失禮俗此其爲世道之助也大矣今之以詩知公者其淺鮮矣哉余因韓牧使父子稔聞公風聲韓是文元公宅相也今養而之狀又如此豈不見重於今與後也牧使公嘗以從勳贈公承旨然非公平日雅志故題其墓曰龍溪處士云 崇禎紀元後壬戌月日德殷宋時烈述

義禁府都事曹君墓表

曹氏望昌寧者實自高麗大樂丞諱謙其後最顯者諱尚治事我 世宗大王官副提學諱繼殷叅 中廟朝靖國勳官至三品職追 贈禮曹判書昌山君是君曾祖諱應卿別提諱世俊判官是君祖及考判

官娶

世宗大王後縣令淑之女生君君諱麒瑞字

仁吉

萬曆壬午君年二十七中生員試第二名物

論囂然稱屈占一名者不能安不赴恩門宴以首席讓君一時又盛傳其事既而與吳士堂允謙金仙源尚容李梨川弘胄友善共游牛溪先生門士友益推重焉己丑鄭汝立謀逆覺發崔永慶因瘦死獄中朝廷以永慶之獄始由儒士姜海梁千頃等刑訊甚酷君憐其寃狀獨疏以訟姜梁大爲一番人所詆而大學諸生論薦君行誼遂除義禁府都事則崔黨施君儒罰以錮之君卽匹馬南歸日與親友徜徉于靈巖之月出山下辛卯十一月三日竟卒知舊莫不嗟惜

焉君天資端雅趣向既甚正而文藝夙成若將有爲而望罹險艱不容於世年又早闕豈非命也耶配林氏正郎渾之女貞慤慈仁君歿子幼遂遷居于外弟南郭朴公東說之里使之受學卒有所成立六親皆稱之男長忠立次僉樞行立次二男早夭女適李希立孫郡守敬彬敬璋敬璨敬翰敬輔女爲鄭公弼妻皆僉樞出內外曾玄甚蕃敬輔之男一周與余游今以諸父之命奉南郭朴公從孫世采狀來請文以刻于墓石

坡平尹公墓表

有守真保醇身李貌古不累於時而以沒其世者曰故坡平尹公諱弘裕字可順也公以名父子起居息食不離訓典生長京華有文有筆以此求名何所不可乃退然自閔靜若枯井止如深淵人開以後時則曰羞向人前費乞字悶其貧則曰我道蓋如是也

崇禎癸未七月十九日年七十八而終于清州之寓舍知公者不恨公而恨世之不知公也高祖師夏左通禮曾祖宥掌令 贈都承旨祖應奎僉正 贈判書考仁涵叅判 宣廟朝名臣也有公所記墓表妣羅州丁氏其父應斗爲贊成配昌寧成氏節度使錡之女後公六年卒于戊子六月六日與公同葬于楊州青松里叅判公墓左已向之原公外柔內剛臨財不

苟事親服勤顛沛不貳喪創尤至常居墓側掃除必親蓋其質行雖以儒名者皆以爲莫及也四男惟晉縣令惟聖天惟益惟鼎皆業儒女適叅議李有謙惟晉男翊卿早卒尚卿生員監察夏卿咸卿亦皆天舅卿喜卿舜卿女適進士李箕相側出達卿遇卿女爲叅判李汝發側室惟益男宣卿任卿生員皆天憲卿擬卿二女適魚震夔朴世榮惟鼎男元卿三女適縣監許壇生員朴世彙士人韓宇量李有謙有重名五男長翮前縣監翎以孝死翔以學名翮翊以文見譽監李悖其壻也公之子孫內外多賢蓋見潛德之行於家也嗚呼上世位必稱德中世已有不稱之歎今

公則不稱又不得言士之生乎季世可慨也已

松村蔡公墓表

余表兄金金吾浣氏甚有文行每稱其師松村蔡公之賢曰非今世人也及余從李原州文諱聖淵及其胤觀察使東稷游益聞公平生每恨不得一掃其門而質疑焉今公之孫昌寧使君頰以公墓石之記見託嗚呼金金吾及李文二世皆不可見而今狀公者東稷之胤秀彥也嗚呼古人有言不見其山見其木以茲數公之賢而亦足以知公矣按狀曰公諱宗吉字善餘仁川之蔡著自高麗有曰先茂贈同知事其子諱慎徵其孫寶文皆爲大官自後七八世皆襲冠

冕而顯於 本朝者侍講院弼善諱倫也曾祖諱年  
縣監 贈承旨其兄壽以文鳴於世而貴 贈其考  
諱申保吏曹叅判邵城君承旨生承旨諱洛是生公  
之考諱無易官翊衛司侍直妣金氏其考察訪壩以  
孫昇平府院君塗靖 社勲 贈左贊成公以 隆  
慶丁卯生于漢師之駱峰里第聰悟絕人生未幾自  
能知書八歲二十八而遭考妣喪四十四而陞上舍  
則光海之二年也政已亂而後數年有廢 母議公  
歎曰尚可求進乎遂杜門歛迹家在清州之上黨山  
下金川里沉潛經史樂而不厭與李西溪諱德胤所  
居不遠徃復論難久益不懈 天啓癸亥 仁祖太

王卽位朝廷選舉遺逸公爲 禧陵齋郎肅謝而歸  
翌年甲子逆迨反 上南幸公倡率忠義士數百犇  
問 行在特陞主簿移司憲府監察已免歸時朝廷  
重良社謹擇守令以公爲求禮縣監 朝命至則公  
已以其十一月廿五日卒矣公居家事親奉先敦宗  
誨人親友其善行不可殫記而惟立義正行乃其志  
節也鄉人朴以儉希賦臣旨上讐 母疏公削其名  
儒籍時異議者無不立碎而公終不懾於是一鄉之  
人皆不從亂其功大矣狀又曰公常着力於洛閩諸  
書此必有稔然有會於心者而人不及知也公最深  
於易之筮法嘗書一小紙曰余以某年月日時逝矣

末又書曰得此紙者必某人也其後一皆驗公其遂  
知來物者歟配李氏進士彥之女無育後配金氏學  
生峰壽之女有婦德先公十六年卒男長曰應昊次  
應夏長房四男頓頊碩昌寧其第二也女適朴元錫  
次房二男願領二女適權尚經李世晟內外曾玄多  
不能盡錄墓在清州治北德洞山子坐之原嗚呼茲  
數尺之碣豈足以不朽公哉其在人誦慕不衰乎金  
金吾公之高弟而李文謂公舅者也其後二世皆承  
李文渭陽之思嫻好甚篤云

花巖處士李君墓銘

花巖處士李君諱俶字善初光海戊午隱居于堤川

之白雲山 崇禎乙酉卒葬于忠州之無愁山後四  
十四年德殷宋時烈慕其行義撮其家狀而爲銘曰  
周文之昭魯衛毛聃我 世宗聖廣平其男永順有  
勲有章而舍其屬益疎洁爲縣監其子遇春周蓮陶  
菊清逸之趣超今耀昔君爲其子其心翼翼承其志  
操襲馨香德嘗就公車雖隸司馬雲霞之癖實天所  
藉雖居城市事皆山野維時政亂椽喪天紀樂與同  
志舟于江漢溯至東峽山高石爛我樵我漁薇亦柔  
止惟古隱者脫略名教晦父有言山林人傲君則不  
然窮經飭行事親盡歡施于有政洞名曰壽堂曰寧  
極詞人韻釋詩以歎息文叔所榮倘來揮却金文正

公美其行藏謂廬江屈惟在安陽縻以馬丞雲棲之側君不洗耳暫離石榻而非所樂其歸斯亟俄驚風樹怨深我蓼草木之滋人不敢勗神實扶持克終孝服玉樹俄摧年七十八士林挹芬宗盟悼失林主簿潛其女是妣有媿其德其配朴氏其考希立其官牧使先生一女後有男四之茂之芳之英之蓋青松沈統來爲玉潤之蘭之蕙側出之子曰籩曰簪長房錫類惟篋箱笈是其庶出惟其二房最稱蘭茁籥箴筮筵二則是孽籊篋箴篋三房攸生錄管籥第母奔傍榮四房無育爲嗣者箴從竹而下皆以世名復觀咸甲發泰翊昌烈達傑哲亮貞而訖凡其曾玄數餘於

百今表墓前狀者世甲紹介者誰大司憲選同祖承順好賢斯腆我稽君世天潢之派我考君才珠玉其唾以茲人地投何不可乃如浮雲甘此邁軸比如紈扇寒林雪竹以此題品庶曰相著

苔查處士鄭公墓表

處士溫陽人號苔查又號旅窩最後稱以耻麻京華名族也諱瑄字君玉生二十三遭倭亂愴荒南土卜築懷德之荆江杜門不出仁祖反正仍放言自廢年七十二而卒辛巳十月十五日也以嘗還賊兄弟爭死朝廷褒贈察訪職處士神清骨秀無一點塵垢常師慕陶徵士大書北窻清風以揭壁觴詠之外



無餘事間以黃冠野服徜徉阡陌每自言君子遊世  
無悶嘗有詩曰 崇禎垂十載東海有遺民江山自  
終古日月此何辰其平生事固多可書而此其大略  
也處士詩主李杜李月沙鄭愚伏皆稱之曾祖縣監  
諱守綱祖大司憲諱裕考縣監諱姬鄰妣 太宗大  
王五世孫其考郡守遠也處士再娶皆朴氏前孺人  
生子河應後遇賊殉節追旌其里墓在懷德山陰原  
後孺人承其德視河應如己出亦先卒生洛應洙應  
泗應曰溪應側出也河應生三女適李天如尹海李  
惟復洙應男楷捷女適李時雄泗應男樞機女適金  
自剛余先人與處士契誼甚厚余因隅坐覲德熟矣

每酒酣詠詩聲若金石亦大罵當路人無所畏忌匪  
直余後生人人皆莫能測知也墓在文義後洞聞其  
將以石表之遂書其後而係以辭曰

宇宙之間寓其形也心情寂寞物無嬰也隱居獨善  
行中清也古人中求晉淵明也有欲知者觀此銘也

僉樞邊公墓表

公諱信字君寶鼻祖安烈本中州人避元亂隨恭愍  
王徂東王妻以判樞密元凱之女以元籍原州故從  
而賜鄉焉屢立武功封府院君領印三司生諱順佐  
軍摠制摠制生尚全正生德順平市令平市令生  
祥輔德輔德生用瑗生員生員生沆贈工曹叅議叅

議生繼源以老受通政卽公考也妣林川趙氏昌城  
府使應純之女以 隆慶庚午九月初六日生公自  
幼端重不妄言笑遭亂奔播少而失學晚習武藝中  
庚子科成還除守門將旣而棄歸村庶力田以養其  
親怡然自樂無復求進之意時如申公景禎具公宏  
寔公中表昆弟之子而延平李公貴亦從妹夫也皆  
知其篤於自守交相招致而終不肯應曰幼不學長  
無述未有涓埃之補而徒竊祿位吾實耻之凡於取  
與絲毫不苟平居接人不爲款洽交遊而與數三同  
志終始莫違庚辰因優老典陞折衝僉知中樞府事  
歲癸未四月十九日以疾終于家享年七十有四其

年月日葬于縣南聖巖洞某向之原後十五年丁酉  
十月廿六日與夫人金氏遷而祔葬于居第之後巽  
向之原公初娶安山金氏忠義衛慶犀之女甚有嬾  
德丁未月日先公歿後娶草溪卞廷立之女後公廿  
七年己酉四月四日卒追祔而爲品字墓從公意也  
金氏生男得安二女適李瀛縣監柳仁壽得安娶丹  
陽禹克任之女生三男暉暉曦三女適朴世徵鄭處  
慶李箕望李瀛生一男之楨女適李尚文縣監生二  
男輯轉女適慎誠立暉娶沈景憲之女生二男四女  
男長遇亮女適金孝先餘幼暉娶柳澳之女生四男  
三女男長遇張餘幼曦娶梁侗之女生三男二女男

長遇泰餘幼之楨生五男長再興餘幼輯生二女幼轉生二男幼遇亮生一女幼內外曾玄摠若干蓋公天稟甚醇篤於自守而不以外物嬰其心其平素懿行固非一二而不唯家乘無稽未能詳悉抑以公之素志不欲爲皦皦以聞於人故只叙其梗槩如此

平昌郡守崔公墓表

國朝故家右族能世舊德者有完山崔氏家平昌公尤不失青瓊素業兼有絕藝自幼爲稱家兒其墨妙入神見賞於 宣廟恨不以爲翰林朱 詔使之蕃願與相見見其揮灑飛動而極稱之由是雖爲蔭仕而名聲藉甚平看玉堂鑾坡矣氣度清曠操履嚴重

孝親友弟夫婦如賓其家法蓋不失風火嗃嗃之象矣嘗渡江遇風船幾覆整坐如常旁舟敗沒篙工不拯其漂浮者曰俗忌也公疾聲大呵曰人死敢言俗忌乎其人竟得以活人服其氣定而心仁也蓋公喜讀心經近思義理諸書其所得所養者如此外官時復父母仇者當以殺人論死公曰此義殺也若殺此人世教傷矣上官不聽公卽棄歸此幾於周夫子置手版風彩矣公亦嘗好觀一雙鵝及解官依留犢故事不以籠歸亦見其標格也百姓立鐵碑以頌之始祖高麗神虎上將軍純爵 本朝益爲名族平度公有慶揚度公士儀仍父子以廉潔載國乘至大司諫

諱鐵堅卓犖偉人也事載象村所撰墓碣娶晉州鄭氏生公諱行字之源 崇禎丁丑年六十八而終焉其官自司饗叅奉平進累轉司憲府監察爲江東牛峰二縣監麻田寧越平昌三郡守墓在揚州松山先塋配沈氏其考監司岱李氏其考校理尚弘皆別葬男繼昌繼興繼雄繼雄府使女壻蓬萊君炯胤僉樞張仲仁李義老安定邦鄭時廣府使朴敏道李亨業李有滂長男及二女沈氏出也長房生寬今爲大司憲追 恩贈公吏曹叅議次宣憲次房生實直長定縣監季房生寔寔爲縣令公好山水遊每有超然出塵意不屑屑於俗務故以其才藝氣槩終於下僚

今大憲蔚然爲盛朝名臣豈公遺澤也耶

鄭公希慶墓表

鄭公希慶迎日人字善餘孝性出天常以順適親意爲務親執滄滄不任婢使一日不在側則其色惘然若有失其母嘗病疽口吮濃汁以舌舐其四圍以止其疼間或祝天禱祠乞以身代其母竟至于瘞人謂誠孝所感後丁鉅創結廬墓側日三哭拜不脫經帶旣練猶不食菜果形貌枯槁見者驚愍而猶不變喪除值倭變避亂蒼黃之際常負神主于背上隨所歇泊必設位權安展拜以致敬得時物輒薦之諱日則閉門齋肅不通人事其妹爲水使張義賢夫人當析

著時公恣所占取終無一言周恤貧族雖牛馬無所  
靳一日客有過者公見其有戚容問之則曰亂離親  
死寓殯遠土行丐于知舊將以營葬耳公哀之卽出  
綿花百斤以與之客造次驚訝不敢受公曰吾哀子  
之情事未伸此何足辭客感泣取去家有老婢忽有  
人至門名其婢曰汝非吾家舊使乎公聞之悉召其  
所生數十口以與之公之行事多類是鄉黨莫不尊  
敬焉蓋公少讀書通曉經傳大義其行誼之卓然不  
惟其資質之美而已也鄉人舉公孝行屢申于縣官  
方伯或以徹于朝聽而未蒙旌典竟以優老秩享年  
七十九而卒于永同之伽伽洞始祖襲明高麗樞密

院知奏事以直道忤毅宗仰藥死事載本傳 本朝  
淵兵曹判書於公八世祖璘縣監考仁老不仕妣安  
氏忠順衛珎之女冶隱吉先生之外裔也甚有婦德  
公娶縣監李珎女生男升瀛升瀛男鯤溟別坐次鵬  
溟次東溟女適李耆雄次適直長柳埴內外曾玄若  
干公容貌魁偉重遲不輕動生長豪富輕財行義至  
其暮境家事冷落躬自薪芻朝夕矻矻而少無戚色  
曰吾少也過於豐贍今焉如此此實翻覆之理也直  
須任之而已結草屋于靜僻處日與里閭行然相樂  
自製歌曲以侑觴皆安貧賤輕外物之意也噫公之  
潛德終不見於世豈非可惜也公余母族也慣聞公

事爲今別坐之子碩沂來請文以爲記略書其一二  
如右云時 崇禎紀元之四十七年閏逢攝提格恩  
津宋時烈書

牙山縣監朴公墓表

吾從祖祖父宋牛峰應光有女從祖祖母尹氏賢且  
愛之求名家子可與敵者有曰密陽朴氏家有好措  
大名安建字士建尹氏曰何如曰措大古新羅王遠  
裔其高祖增榮弘文館校理以文行大鳴號訥齋曾  
祖薰承政院承旨世所謂江叟先生祖善元僉知中  
樞府事其父承賢縣監其外祖護軍南勇錫措大性  
厯厚順善不言人過真率無矯飾雖少甚得鄉里心

尹氏曰可矣公旣厚善又取內助以自益事父母處  
兄弟多有人所難者自是交游漸廣三十八爲監造  
官出監居昌牙山兩縣有遺愛間爲社稷令在居昌  
時桐溪鄭公蘊直言竄海上禍且不測公出餞於道  
又數遣人存問其大夫人識者美之 仁祖甲申爲  
司憲府監察時公年已高供職甚勤同類雖少年莫  
能及今 上辛丑八月廿二日卒嘗蒙優老典階通  
政恭人端淑溫順婦德俱備六親無不稱之生于  
萬曆丁丑先公八年卒與公同葬清州木瓜洞分土  
原男廷龍今爲安陰縣監廷麟察訪廷鳳廷彪女適  
竹山朴之煥安陰生世輝世美世長世憲四女爲申

湘黃有孫崔堦朴慶后妻察訪生世重世萬世厚世  
千世大世度世拯世萬爲廷鳳後廷彪生世翼世傑  
女幼內外曾玄多不能盡錄公喜施與濟人之急甚  
於己私歿時年八十八鬚髮不白步履輕利能大嚼  
健食前一日沐浴更衣躡屐歷遍諸子家翌朝扶而  
起坐曰吾將逝矣歛時顏色如生見者皆歎且異焉  
此必有所以而人莫能知也銘曰  
朴出羅王厥緒綿綿訥齋之後有江叟賢公乃承膺  
遂延蟬聯有壽有後福慶之全我作銘辭以表其所

學生李公墓表

世有不失赤子心者曰慶州李文諱復益字承先天

稟醇厚無一毫矯飾平居與物無競所有土田臧獲  
人或取去悠然不以介懷以大家子孫貧窮困瘁幾  
不能自立而亦不以爲意柄人或有汲引意則不肯  
曰我才不堪爲世用也竟杜門鄉里年七十五而卒  
于 崇禎辛卯十月二十三日墓在報恩治南荒谷  
里卯向之原先兆也始祖曰謁平羅祖佐命功臣至  
麗氏朝益齋先生齊賢文章德業大鳴於天下入  
本朝達官相繼高祖思權郡守曾祖健縣監祖貞宗  
考胤皆有郎階妣李氏 世宗大王玄孫其考廣原  
守耆壽也娶完山李謙女生一女適府使宋時燾再  
娶漢陽趙龜祥女生男埽塙塙孟季皆夭女適申燿

煥男女各五人覃慶昌慶元慶鳴慶有慶女壻朴履  
寅金狝金以成郭榮季未行外內孫摠四十餘人煥  
從余問字久而府使吾弟也因以服習有素故書于  
石以表其墓云 崇禎旃蒙赤奮若仲春日恩津宋  
時烈述

副護軍 贈吏曹叅判尹公墓表

尹公弘國年二十六登第聲名謁蔚旣而鄭松江澈  
爲世所仇公松江門下也坐是坎軻旣而復爲奸臣  
爾瞻所惡年四十以龍驤衛副護軍 萬曆乙卯十  
一月初六日卒于京邸其配迎日鄭氏其子夏夔度  
其孫昌來慶來其友金文敬公集李叅判命俊宋佐

郎邦祚尹大諫煌其師沙溪金先生始公以孤童養  
於伯氏監司公安國金先生愛其兄弟相友勤學不  
怠旣教之又歸以妹壻之女妹壻卽鄭松江長子也  
公中心坦夷慕古尚義嘗謁牛溪先生先生亟稱之  
語在先生日錄嘗自言曰丈夫處事當灑灑爾屈身  
諧俗耻也晚歲欲託於沉冥且將歸田以沒世而未  
果也其憂時慷慨律身清苦出於天分此公之所以  
不容於世而亦以見推於儕流也公之善行不可選  
記而其所誦而終身者不忒不求四字而已此公安  
身立命之基本也歟其官職自尚衣院直長歷承政  
院注書咸鏡北道評事兵曹佐郎正郎蔚山府判官



延曙道察訪黃海道都事兼春秋館記注官成均館直講嘗以記事官與修國朝實錄以書狀官如京謝恩其爲副護軍則賞加通政時也後以從勳贈吏曹叅判配鄭氏從受貞夫人誥公字張卿高麗時有都評議使崇始著籍揚州我朝有府尹璋有名成廟朝其子繼勳孫時雨皆早世至其曾孫應商始以水運判官通籍於朝是公之考以通經飭行見稱沙溪先生實銘其墓妣李氏讓寧大君禔之後縣監元友之女鄭夫人靜淑宜家每以毋忝所生戒諸子公嘗語夫人曰飲啄有定勿以有無關我夫人亦謹於辭受懼以一毫溷公此又見公之化其家也

夏無嗣夔出後於人承公祀者實度也夏官止奉事泰來開來其側出也內外孫曾總若干公以高才美行宜達而室不施所有而壽亦不永惜矣哉然美金雖在塗泥良工必鑿其彩成金兩先生豈其人歟公其附青雲之士者歟銘曰

雄雉之詩由也終身是道何臧縱有聖言民久鮮能公實有矣惟其有矣衆善之萃諸老先生其有所試

九菴先生文集卷一百三十九

